



Wantok



Namba 2038 Septemba 19 - 25, 2013 28 pes

Niuspepa Bilong Yumi Ol PNG Stret!

K1 tasol



Nau yu ken Teksim Wari, Tingting, Painim Pren o Pas bilong yu i kam long Digicel namba **7235 6149** na bai mipela putim long Pes 2...



FOLDIM FLEG BILONG GG: Ol ami i foldim plai long givim long Gavana Jeneral taim ol daunim long apinun bilong Independens de. Gavana Jeneral save givim toktok bilong em go aut long kantri long olgeta avinun taim yumi save amamasim Independens bilong yumi. Dispela fleg ol ami foldim em Gavana Jeneral i bai kism long tingim 38 Independen. Poto Nicky Bernard.

MI SAVE TOKTOK OLGETA DEI

Paim tasol 59 taim long wairapa want tok long first 3 minits na kiam nupela 17 minits FRL. Revider "talk" i go to 1000 min.



59t PER MINUTE



Digicel

3G DIGICELPNG.COM

Gavman tekova long OTML

Stanley Nondol i raitim

GAVMAN bilong Praim Minista Peter O'Neill i yusim namba pawa na kamapim senis long Ok Tedi Mining Act na tekova long PNGSDP na Ok Tedi Mining Limited na i gat bikipela pawa long mekim desisen bilong bihain bilong OK Tedi na PNGSDP. Aninit long dispela senis bilong lo, ol sea bilong PNGSDP bai kensel

na go bek long gavman, na tu, ol papagraun o ol pipel i gat rait long kotim BHP long environmen bagarap wok maining bin kamapim long ol ples long Ok Tedi. Gavman gat pawa aninit long dispela lo long makim bot memba na siamen bilong PNGSDP we nau go pas long menesim \$US 2 bilien bilong PNGSDP we kam long 63 pesen dividen bilong OK Tedi Mining Limited. Gavman bai putim nupela menes-

men go insait long OTML neks yia na bai kenselim 122,200,000 sea bilong PNGSDP na bai givim go bek long stet. Praim Minista O'Neill i givim notis pepa long kamapim senis long moning na palamen i votim long 62 - 0 long kamapim senis long kism bikipela bilian kina long avinun bihain long sotpela dibet. Nogat tok klia dispela taim long wanem rot bai gavman i yusim long kism kam bek & US 2 bilian bilong

PNGSDP stap long akaun long Singapore. Dispela nupela lo tu i no tok klia long hamas pesen bai papagraun, Fly provinsel gavman na Nesenel gavman bai kism. Tasol, Praim Minister O'Neill i tok gavman i gat ful Kontrol bilong OTML na PNGSDP. Em i tok gavman bai makim nupela bot memba na siamen aninit long nupela straksa gavman bai putim.

I go moa long pes 2...

Marat sut tok long Gavman - P2

Namah tok, O'Neill laik kamap Dikteta - P3

Ikonomik developmen i no groa - P5

Ritim ABC na Wolnius long P12



Braised Steak na Vejtabol





Teksim Wari, Tingting, Painim Pren, Wantok o Pas bilong yu i kam nau.. Digicel namba: 7235 6149

Marat i sutim tok long gavman

Michael Novingu i raitim

Maski Papua NiuGini i kisim independens 38 krismas i go pinis, gavman i no givim gutpela sevis long ol manmeri long kirapim gutpela sindaun bilong ol long ol komyuniti.

Memba bilong Rabaul, Dokta Allan Marat i mekim dispela toktok long makim 38 krismas bilong kantri i kisim independens long Rabaul Yot klap.

Dokta Marat i tok olsem aaski yumi gat planti risos olsem maining, pis, timba, kakao na kopra tasol yumi stap tarangu yet.

Em i tok no gat wanpela long ol dispela samting yumi kamapim i stap long ples klia i soim olsem yumi gat planti samting.

Marat i tok wok bilong ranim dispela kantri i no wok bilong ol politisen tasol, nogat.

Em i wok bilong ol sios, komyuniti, bisnis haus, na manmeri bilong dispela kantri long wok bung wantaim long kirapim kantri i go het bai kirapim gutpela sindaun bilong ol manmeri.

Marat i tok mama lo bilong kantri tu em dispela gavman i wok long senisim bikos sampela ol memba long palamen i laik stap long na kisim strong na pawa long inapim laik na tinting bilong ol yet.

Ol i no wari long helpim ol arapela manmeri long dispela kantri.

Em i tok hevi bilong lo na oda i bagarapim kantri bilong yumi we dispela gavman i no inap long stretim na kisim ol polis bilong arapela kantri i kam long stretim.

Mipela i kisim independens pinis na mipela i mas sanap long tupela lek bilong mipela long stretim ol hevi.

Marat i tok tingting bilong yumi i paul pinis na mipela i noken tok mipela i kisim independens pinis.

Em I tok yumi i feil pinis.

Dokta Marat i singaut long ol memba bilong palamen na manmeri bilong dispela kantri long senisim pasin na givim laip bilong ol long papa God bai helpim long ranim gut dispela kantri bai go het long kisim sevis i go long ol manmeri long kirapim gutpla sindaun bilong ol long ol komyuniti bilong ol.

Marat i tok dispela gavman i bagarapim pinis demokrasi o fridom bilong dispela kantri long palamen we ol liklik lain tasol i kisim helpim

Em i tok no gat demokrasi long kantri bilong yumi, na no gat gutpela wokbung wantaim long kirapim kantri i go het.

Em i tok dispela gavman i olsem diktetasip o i laik papa long olgeta samting we no gat arapela manmeri bai papa long

en.

Long wankain taim gavana bilong Is Niu Briten na memba bilong Kokopo Eremen ToBaining junia i tok bihain long 38 krismas, dispela kantri i kisim independens, dispela gavman i mekim bikpela wok long kisim sevis i go long ol distrik na LLG.

Gavana To Baining i tok O'Neill/Dion gavman bai go het long kisim sevis igo long manmeri bilong dispela kantri long ol krismas i kam bai ol i kirapim gutpela sindaun long ol komyuniti bilong ol.

Em i tok em i gavana bilong Is Nu Briten na wok bilong em nau long kisim sevis i go long 4pela distrik em Kokopo, Rabaul, Pomio na Gesel bai ol pipel i kirapim gutpela sindaun long ol komyuniti bilong ol.

ToBaining i tok sampela ol wok em bai kirapim em long kisim Nonga haus sik i go long nupela hap long Wairiki na mani bilong karimaut dispela wok i redi pinis

Em i tok Vunamani famas trening skul ol bai apim i go antap olsem politek teknikel skul, wok long wokim rot i go long joinim Kokopo wantaim pomio bai go het yet, na hap rot namel long Vulcan na Rabaul gavman i makim pinis K8 milien i stap pinis long stretim dispela rot.



Ok Tedi Main..

Gavman bai tekova long OTML

I kam long pes 1...

Dispela wik, PNGSDP siaman Sir Mekere Mourata na praim minister O' Neill i kamapim sampela tok pait long dispela hevi. Sir Mekere i tok gavman bai stilim mani bilong Westen pipel taim lo i senis.

Praim Minista O' Neill I tok Sir Mekere em I no makim pipel bilong PNG olsem bod siaman. Em tok Sir Mekre I makim BHP kampani bilong Australia.

Praim minister i tok gavman i kamapim dispela senis long

givim mani bilong Western pipel go bek long ol long mekim wok divelpmen long eria bilong ol.

Praim Minister i tok aninit long gavman bilong nau siaman bilong PNGSDP na pas-taim praim minister Sir Mekre Mourata long 2010, palamen i kamapim senis long lo long noken kisim BHP na kampani operetim Ok Tedi main go long kot long envoironmen bagarap.

Aninit long dispela senis, husat laik kotim BHP ken go

het long kotim long envoironmen bagarap wok main bin kamapim long planti yia go pinis.

Dispela senis bilong lo em long senisim menesmen tasol. Olgeta wok man na meri bilong OTML bai nonap lusim wok bilong ol na bai stap yet.

Menesing Dairekta bilong PNGSDP i tok em amamas tasol long disisen bilong gavman. Em i tok bikpela samting em wari bilong seaholda na divelopmen bilong givim sevis long papagraun.



Polis Ripot

LLG Presiden i dai long rot

LAE: Wanpela kaunsil presiden i dai na tupela arapela man i kisim bagarap bihain long ka ol i ran long en i bin kapsait. Dispela birua i bin kamap long 9 mail rot bung bilong haiwe i go long Bulolo. Plis ripot i tok man i dai long birua em Sam Sakai wanpela nupela presiden bilong LLG. Em i wok long karim wanpela sikman i go long Lae haus sik long taim dispela birua i bin kamap.

Man kukim meri long petrol

POROMA: Plis ripot long Poroma, Sauten Hailans i tok wanpela man i bin kapsaitim petrol antap long meri bilong em na kukim em. Dispela man bilong ples Undu Kopa i sutim tok long meri bilong em i paul wantaim narapela man na i pasim em na tromoi petrol na kukim em. Paia i bagarapim wanpela sait bilong bodi bilong meri ya. Ol i kisim em i go long helt senta long Det long kisim helpim.

Paia kukim foapela haus

MT HAGEN: Foapela famili i no gat haus nau bihain long paia i kukim tripela haus na wanpela PMV long banis bilong ol. Dispela birua i bin kamap long ples Rauglamp long Pangia kompaun. Ol polis i no tokaut long as bilong trabel. Dispela birua i bin kamap long Sande taim olgeta famili i bin go lotu. Moa long 14 pipel olgeta long dispela banis i no gat ples long stap nau.

Ol kalabus i fri aninit long parol progrem

KERAVAT: Tupela kalabus long Kerevat, Is Nu Briten i kisim tokorait long lusim haus kalabus na kam stap autsait aninit long parol progrem. Ol tupela man ya i bin stap longpela taim long kalabus nau na ol i bin stap gut olsem na ol i kisim tokorait long stap insait long progrem. Tupela wantaim i amamas na i tokim ol arapela lain i mas stap gut na no ken brukim lo na go kalabus.

Kot bilong Tiensten i go yet

NCD: Memba bilong Pomio, Paul Tiensten bai kamap long Nesenel kot long dispela wik long defendim ol sas long K10 milien mani i bin go long Travel Air kampani. Kot bilong em i bin stat las wik na bai i go yet long dispela wik.

Stilman stilim ol samting long stua

BUKA: Ol stilman i bin go insait long stua bilong wanpela man Saina long Buka na tilim ol samting. Ripot i tok dispela stilpasin i bin kamap long Sarere. Ol stilman i giaman olsem ol kastoma na go insait long stua. Ol i kisim ol naip insait long stua na pretim Saina man na ranawe wantaim sampela samting. Ol i kisim ol spika, jenereta, sol panel, mobail fon na ol arapela samting. Ol i ranawe bipo long ol polisman i kamap.

Polis sasim namba tu seketeri bilong Fainens

NCD: Ol plisman i holim deputi seketeri bilong Dipatmen bilong Fainens na sasim em long mani ol i baim i go long wanpela lo kampani. Dispela man, Jacob Yafai i gat 42 krismas na em i bilong ples Karapia long Yangoru, Is Sepik provins. Siaman bilong Task Force Sweep, Sam Koim, i tok Mista Yafai em i namba tu man long Dipatmen, ol i arestim long givimaut mani i go long dispela lo kampani.

Dia Wantok Niuspepa, mi kaunsila Esonu Kia bilong Gumio- Morobe provins.

I. Wari bilong mi em mipela i stap long remote eria na mipela i askim Digicel long putim wanpela tawa long ples na wod bilong mipela – Gumio Wod. Mipela i bungim bikpela hevi long sait bilong komyunikesen na olsem mipela i save kam long distrik HQ o taun long yusim digicel fon. Plis Digicel helpim mipela.

II. Namba tu wari bilong mi em Digicel i save sapotim planti elementari skul na sapos em i ken helpim ol lain na skul bilong mipela tu.

III. Mi amamas tru long *Wantok Niuspepa* i statim dispela kolum long mipela ol grasrut i ken autim tingting bilong mipela .

Tenkyu, *Wantok. Esonu Kia - 12/09/2013*

Dia Edita Wantok, Wari bilong mi i olsem, planti hevi i kamap long hombru o stim na drak so nogat inap polisman long ilektret na provins so inap Is Sepik Provinsal Gavman i putim ol oksilari polis kam bek long wok, ol bin mekim gutpela wok. Tenkyu.

Freddy- Kubalia, Wewak - 15/09/2013

Dia Edita, Mi sapotim na laikim *Wantok Niuspepa.*

DMAor Krx – Madang - 11/09/2013

Dia Edita, Mi gat bikpela laik long salim ol stori na nius i kam long *Wantok Niuspepa* olsem sapot staf. Inap yupela toksave long mi.

Paul - Kaubebe St. Boroko - 10/09/2013

Dia Edita (Wari long PNG tude na tumora) PNG min? Pipel i stap klostu wantaim God olsem wanem na planti bikhet pasin kamap long PNG? Wok lida insait long nesanel provinsal, distrik na LLG i no kamap long inapim ol liklik ol manmeri long PNG na tu yuniti i mas stap namel long olgeta sios lida na ol politisen bung wantaim long senisim na soim mining bilong PNG. Politisen manmeri i mas wok bung wantaim sios long inapim dispela het tok antap.... PNG lida i mas opim ai na implementim DOV program insait long kantri.

DOV trenu - Nassy Kamex - 17/09/2013



AUTIM WARI O TINGTING BILONG YU NAU!!!

Namah tok O'Neill laik kamap dikteta

Frieda Sila Kana i raitim

OPOSISEN lida, Belden Namah i tok strong long ol memba bilong palamen i no ken sapotim senis long mama lo long seksen 124, na 145. Mista Namah i mekim dispela toktok long taim em i kamap long FM 100 redio Tokbek So long las wik Fraide.

Mista Namah i bin kamap na toktok long redio wantaim Namba tu Oposisen lida, Sam Basil, wantaim Sedo Minista bilong Atoni Jeneral, Jastis, Dokta Allan Marat long autim wari bilong ol long pasin Praim Minista Peter O'Neill i mekim long senisim ol hap bilong mama lo i bosim wok bilong gavman.

Mista Namah i singaut long ol 105 memba long



Belden Namah: Oposisen Lida

palamen i no ken sapotim dispela senis long seksen 124, na 145. Gavman i laik senisim taim bilong kamapim vot bilong nogat bilip long gavman.

Dispela seksen i stap olsem, Oposisen i ken kamapim vot i nogat bilip long gavman, bihain long 18 mun gavman i holim wok,

tasol nau, Praim Minista i laik skruim taim i go long 30 mun olgeta.

Mista Namah i bin kamap long redio na toktok wantaim Ritaia Kenel Reg Renagi, long sampela pasin Praim Minista i wok long mekim long mama lo na ol narapela bikipela samting.

Mista Namah i tok sapos Praim Minista i winim tingting bilong ol memba na ol i oraitim dispela senis bilong mama lo seksen 124 long

skruim taim bilong vot i nogat bilip, em ol i helpim O'Neill long putim wanpela banis raunim em bai no gat man inap salensim em.

Em i tok, "Dispela em i rot bilong kamapim wanpela dikteta gavman long kantri. Mi bai i no ken slip. Mi bai pait yet long stopim gavman i no ken bagarapim mama lo bilong kantri."

Em i tok em bai strong yet long salensim tu dispela senis long mama lo we bipo gavman i bin senisim taim bi-

long vot i nogat bilip i go long 18 mun bihain long ol i kisim gavman.

Namba tu Oposisen lida na memba bilong Wau-Bulolo, Sam Basil tu i autim sampela bel wari bilong em.

Em i tok, "Ol memba i no ken wanbel wantaim dispela senis gavman i mekim. Nogut bihain bai ol yangpela lida long 2017 ileksen i yusim dispela lo long bagarapim kantri."

"Mama lo bilong kantri i bin kamap long ol tingting ol i bin kisim long ol pipel long olgeta

hap bilong kantri. Nau dispela gavman i bagarapim mama lo pinis bikos ol i senisim sampela hap bilong en long laik bilong ol yet. Ol dispela senis i wok long kilim mama lo isi, isi na i no longtim bai yumi gutbai tasol long em," Alan Marat, memba bilong Rabaul i tok.

Mista Namah i tokaut olsem nau em i gat 6-pela memba bilong Oposisen i stap tasol ol bai i no inap lus lain na kalap i go long gavman.

Madang Festival bringim bek naispela kala long provins

James G. Kila

OL MANMERI long Madang long las wiken i bin amamasim gut stret Madang Festival long Laiwaden graun wantaim kain kain bilas, singsing tumbuna na tu ol promosen bilong ol bisnis na skul insait long taun.

Madang Festival i bin stat long las wik Fraide na i bin pinis long Mandé long Independens De stret.

Gavana bilong Madang, Jim Kas na provinsal gavman bilong em i go pas long

bringim kamap Madang Festival 2013 wantaim gutpela sapot bilong ogenaising komiti aninit long gutpela menesmen bilong siaman Sigfred Sigma. Planti ol bisnis tu i bin wokim ol liklik haus long promotim ol prodak bilong ol.

Ol tumbuna singsing grup bilong planti ol ples arere long Madang taun na tu long ol distrik i bin kamap long samsam na soim tumbuna danis stail bilong ol wantaim kundu.



ToBRAS: Tupela yangpela bilong Noblet Elementari Katolik skul i bilas long Tolai stret long Independens de. Poto: Nicky Bernard

wantok moni

Send money to Anyone, Anytime Anywhere



How to send Wantok Moni

- 1 Dial *131#
- 2 Enter mPIN
- 3 Press 2 for "Funds Transfer"
- 4 Press 3 for "Wantok Moni"
- 5 Choose Account which you will send Wantok Moni from
- 6 Enter recipient's mobile number
- 7 Enter Amount
- 8 Press 1 to confirm

Have you received Wantok Moni?

- 1 **Accept Wantok Moni**
 1. Dial *131#
 2. For a new user, you will be asked to create and enter a 4-digit Personal Identification Number (PIN)
 3. For existing user, enter your 4-digit PIN (this is NOT the send code)
 4. Reply 1 to "Accept Wantok Moni"
 5. Enter the 8 digit **SEND CODE** (code given by sender plus code received via SMS to your phone)
- 2 **Generate a Wantok Moni Withdrawal Code**
 1. Dial *131#
 2. Enter your 4-digit PIN
 3. Reply 2 to "Withdraw Wantok Moni"
 4. Reply 1 to "Generate Code"
 5. You will receive a response containing your **WITHDRAWAL CODE**

Anyone, Anytime, Anywhere!

320 1212 / 7030 1212
 servicebsp@bsp.com.pg
 www.bsp.com.pg | f t



Official Sponsor of the 2015 Pacific Games

Gavman nogat gutpela as long tekova long OTML: Oposisen

Stanley Nondol i raitim

OPOSISEN i no votim senis bilong Ok Tedi lo na tok dispela senis i no tok klia long lo long hamas pesen bai ol papagraun, na Fly provinsel gavman i kisim na tok dispela senis i no gutpela.

Oposisen strongman Tobias Kulang na Deputi lida Sam Basil i kam aut long taim bilong vot.

Oro gavena Garry Juffa, Sir Mihael Somare tu i lusim palamen long taim bilong vote bihain long dibet

Oposisen i no wanbel long gavman i kisim bikipela pawa stret aninit long nupela lo bilong Ok Tedi.

Oposisen i tok gavman i soim piksa nogut long ai bilong wol long i no respektime praivet kamapani na tekova. Dispela i bagrap PNG long ai bilong wol na onvesta long ol bai nogat laik long kam in-

vest long bikipela bisnis long kantri.

Mista Kulang i tok praim minister O'Neill i no tok klia long nupela straksa bilong PNGSDP we gavman bai yusim.

Mista Kulang i tok gavman i no tok klia sapos em bai apim o daunim 63 pesen sea bilong ol pipel bilong Westen Provins. Em tok Mista O'Neill i no tok klia long amas sea bai gavman i kisim. Sea bilong gavman nau stap long

37 pesen.

Mista Kulan i tok olsem wanem long \$US 2 bilong PNGSDP stap long Singapore. Mista Kulang i tok praim minister i no tok klia long husat bai menesim dispela mani.

Oposisen i tok Praim minister i yusim namba pawa long senisim na kamapim bikipela lo long gutpela bilong ol yet na i no bilong pipel bilong kantri.

Mista Kulang i tok dispela

senis em i no gutpela na singaut long ol pipel bilong kantri wantaim ol memba bilong palmen long yusim tingting bilong ol na sekim gut wanem samting bai kamap bihain.

Mista Kulang i tokim palamen olsem gavman nogat gutpela rot stap long menesim dispela bikipela bilian kina bilong PNGSDP. Em tok gavman mas noken kisim mani bilong Westen Pipel kam long Treasari na yusim

long ol arapela wok.

Long wankain taim Sir Michael Somare i tokim Palamen olsem dispela senis em i no gutpela long bisnis na invesmen long ai bilong wol.

Sir Miachel i tok ol yangpela lida i no tingting gut na mekim bikipela senis na disisen long sotpela taim.

Long taim bilong vot tu i lukim olpela Praim Minister Sir Juliua Chan na Maining ministra Byron Chan i no stap long vot.

SABL ripot i bagarap: PM

Stanley Nondol i raitim

PRAIM minister Peter O'Neill taim tebolim fainel ripot bilong Spesol Agrikalsa Bisnis Lis ripot i tok ol komosina i no wok bung na ripot gat bikipela asua na ministrail komiti bai lukluk gen na stretim ol hevi bilong graun.

Taim mista O'Neill tebolim ripot aste long palamen i soimo lsem tripela komisina go pas long mekim ropot i no wok bung long wanpela tim.

Komisina John Nupela givim ripot bilong em yet. Na memba Nicholas Mirau tu givim ripot bilong em yet. Ript i soim narapela memba, Alois Jerewai i bin givim wanpela ripot kam long praim minister.

Mista O'Neill i tok dispela soim olsem komisina bilong i Nkwairi na ol memba i no wok bung wantaim long kmapim gutpela ripot we gavman bai yusim.

Long ripot i siom olsem gavman askim Komisyon ov i Nkwairi long sekim na ripot bek long 75 SABL. Fainel ripot i soim Numapo na Mirau givim

ripot bilong 42 tasol.

Dispela 42 SABL ripot i soim bikipela pasin korapsen kamap long kisim bikipela tumbuna graun long nem bilong mekim agri bisnis long kantri.

Long 42 ripot, 4-pela tasol em gavman givim lis long long SABL aninit long lo. Na 38 SABL ripot em pulap long pasin korapsen na bikipela graun bilong kastonari i lus long han bilong giaman na stil lain long nem bilong bisnis.

Praim Minista i tokaut olsem Minista bilong Lens i makim wanpela ministrel komiti long lukluk gen long dispela hevi.

Ministrel komiti bai lukluk long lisim jastamari graun long givim bikipela luksave long papagraun.

Mista O'Neill i tok bikipela as tingting bilong gavman long kamapim SABL ripot em long kamap wantaim gutpela rot long daunim pasin korapsen kamap long tumbuna graun.

Mista O'Neill i tok ministrel komiti bai holim miting na pablik bai gat sans long kam na autim tingting bilong ol.

BSK Rifaineri makim PNG Indipendens long liklik stail tasol

James G. Kila i raitim

LONG Mande, Septemba 16 taim planti manmeri long PNG i selebretim 38 krismas bilong PNG planti kain amamas na singsing na bilas i kukim stret ol taun, siti na ol stesin long kantri.

Tasol sori tru olsem ol hatwok lain long maining na petroleum indastri long PNG i no malolo. Ol i wok strong stret long wan wan ples bilong operesen long kantri.

Planti long ol main wokman meri i no bin selebret ol i stap na wok. Ol i harim ol stori bilong ol kain kain samting olsem bilas na selebren long taun taim ol famili memba o pren i tokim ol. Wan wan ol wokman na meri long ol main husat i gat sans long go long breik.

Wankain samting tu i kamap long Ramu NiCo (MCC) long Madang we ol wok lain i no malolo, ol i wok hat stret.

Tasol long apinun long Mande ol wok lain i kisim sampela kain Indipendens spesel kaikai we i lukim ol lain bilong NCS-Raibus i bilasim mes long Basamuk na sevim Indipendens kek, pik, ol prut olsem apol na antap long dispela em aiskrim.



MEKIM SAVE: Tripela bagaros wokman blong Ramu NiCo Basamuk Rifaineri long Madang i mekimsave kaikai aiskrim na karim plet kaikai long apinun kaikai bilong PNG Indipendens De. Poto: JAMES KILA



ASKIM DENTIST



ORAL HELT MUN 2013

ZERO CAVITIES

Yu gat askim long tit bilong yu?

Plis ringim "Askim Dentist bilong mipla"

Fri long 7303 2288 tasol

(Em fri long Digicel lain tasol. Ol narapela lain baiyu baim.)

namel long 9am na 5pm Mandei i go lo Fraide inap long 30 Septemba, 2013

Ikonomik developmen i no gro – Urame'

Sape Metta i raitim

BIHAIN long Papua Niugini i kisim Independens long Septemba 16, 1975, kantri i no lukim ol senis na ikonomik developmen.

Em i no gro long las 38 yia. Reveren Pasto Jack Urame husat i dairekta long Melanesien Institut long Goroka – Isten Hailans i tokim *Wantok Nius* olsem, sapos mipela i lukluk i go bek long stat bilong Independens i kam inap nau, ol liklik developmen tasol i kamap. Na planti long yia em i go nating.

Em i tok, "yumi i luksave long planti ol sosel na kalsarel isu, politikel isu, soseri o sanguma, HIV/AIDS, nogat gutpela gavanens na beheivia (behavior) o ol kain kain pasin bilong mipela tu i mekim na long dispela as ol developmen i no kamap gut na gro.

"Na lukluk long politikel sait, bikpela pasin korapsen long olgeta level bilong politiks em i stap we i save daunim tru demokretik rait na stretpela pasin bilong kempen, tromoi ol vot na makim ol lida bilong mipela.

"Ol arapela samting em sik

HIV/AIDS na soseri o sanguma.

"Dispela tupela samting i wok wantaim na i wok long wok strong tru.

"Taim mipela i wok long bisu na westim taim long lukluk na toktok plant long ol isu bilong HIV/AIDS na soseri, ol senis long hauslain na viles komyuniti, taun na ol provins bilong mipela i no mekim wangepela gutpela muv.

"Mipela i ken ting olsem mipela i wok long muv, tasol nogat, mipela i no go fowot na i stap tasol long wangepela hap.

"Mipela i no save i gat

gutpela tingting long skelim pastaim ol samting, bikos taim wangepela man, meri o pikinini i dai long kar eksiden, sik HIV/AIDS o long arapela sik, toktok em i save sut i go long pasin sanguma o posin.

"Na taim mipela i toktok na pulim taitim long dispela ol hevi na isu, taim i save suruk na em i save stopim ol gutpela tingting tu long kamapim progres bilong developmen."

Dispela em Independens selebresen toktok bilong Dairekta bilong Melanesien Institut Reveren Pasta Jack Urame.



Amamas bilong PNG Bon De

LONG dispela wik Mande yumi bin makim bikpela selebresen na amamas long tingim de PNG i kamap Independens long Septemba 16th 1975.

Yumi lukim Praim Minista O'Neill i tok tenk yu na peim rispek long lida husat i wok hat tru na kamapim Independens long taim bilong 38th Independens selebresen.

Ol lida olsem Sir John Guise, Sir Albert Maori Kiki, Sir Iambakey Okuk, Sir Thomas Kavali, Sir Julius Chan, John Momis na Gren Sif Sir Michael Thomas Somare.

Wangepela bikpela samting mi lukim ol dispela lida em kala bilong wok.

Dedikesen, komitmen, self sekrifais na total ekseptens.

Em dispela kala bilong wok tasol God Tri Wan i mekim we na yumi kamap long yumi yet.

Na Independens i min olsem yumi sanap long yumi yet inap 38 krismas olgeta nau.

Tasol i fani liklik long PNG, long wanem, yumi i no fuli Independen yet.

Yumi i wok long kisim helpim yet long Australia, Nu Silan, Saina na planti arapela kantri. Em min PNG i kamapim em yet pinis tasol em i wok long dipen long arapela kantri.

Watpo na i olsem?

Bikos 1. Ol lida bilong yumi i no gutpela long welt bilong dispela nesen (dishonest with the wealth).

2. Position of responsibilities – pasin grid na selfis long moni tasol lida i no moa karim aut ol wok na distributim o tilim welt long sindaunim gut pipel bilong yumi.

3. To be dependent upon wealth is opposite to the teaching of Jesus because Jesus need a complete dependens on the father as one of the characteristics of Christian disciples (Lk 16: 1-13)

Em nau, em gutpela rot bilong pasin Independens n dependens.

PNG em i Independen nesen tasol yumi dependen yet.

Wankain olsem yumi kristen lida na yumi kristen manmeri.

Yumi no ken tok yumi gat fridom na God i mekim yumi Independen pinis na lusim lotu.

Olsem long Sande yumi i bisu tru long Independens bilong yumi na i nogat wangepela lida (politisen) i go insait long lotu na givim tenkyu long ol blessing Papa God i givim long yumi (PNG). I no gat wangepela kristen ol lida bilong palamen i go wantaim gutpela kala flag bilong yumi na bilasim long alta o insait long lotu ples.

I no gat wangepela lida bilong palamen i go givim Independens message insait long lotu. Lukim, God i lukim pasin dependensi insait long kristen laip bilong yumi. Yumi wantaim God.

Em nau, taim yumi tok Independen, yumi lusim God pinis bikos pasin gridi, mi yet, na hambak pasin i bosim yumi.

Olsem na yumi mas glasim gut dispela tupela hap tok, Independens na dependens, long yumi kristen rot long bihainim, em dependens.

Samting yu mekim tude bai karim kaikai tumora

Frieda Sila Kana i raitim

AGAPE Intadinominesenel Ministri Sios (AIM) yut long Taurama Veli Rot i selebretim independens wiken wantaim wangepela spiritual yut kem long Hula, Rigo Distrik.

Long taim olgeta lain i selebretim 38 yia bilong PNG independens long kain kain tumbuna stail, wangepela liklik sios grup long Pot Mosbi i kisim taim long senisim tingting na pasin bilong ol yangpela.

Dispela yut kem i bin stat long Fraide 13 Septemba long nait na i pinis long Sande 16 Septemba nait.

Bikpela toktok bilong dispela yut kem em, "Tude bilong yu bai kamapim tomora bilong yu," na Rev. Arthur Tane bilong Living Lait Foaskwea Sios long Kaugere i bin spesel spika long dispela bung.

Rev. Arthur i bin autim tok long ol yut olsem, ol i mas senisim bel na tingting bilong ol wantaim tok bilong God, na bai ol i ken kamap gutpela sitisen bilong kantri na laip.

"Bihain taim laip bilong yu, em yu yet bai kamapim, tasol wantaim gutpela save long tok bilong God. Tok bilong God em i olsem lait, long soim yu gutpela rot," Rev Arthur i tok.

Em i tok long pasin bilong paitim na bagarapim meri olsem wanem samting sosaiti na kalsa bilong yumi i gat em i save kamapim dispela kain



Geita Simi bilong Agape sios i kisim baptais long wara bilong Hula.

pasin. Rispek bilong pikinini meri i mas stat long haus wantaim papa na brata i rispektim pikinini meri na mama olsem God i wokim man na meri wankain tasol.

Em i tok sapos olgeta yangpela man nau i senisim tingting bilong ol long we ol i lukim ol meri, em bai senisim tru laip bilong ol long bihaintaim.

Em i givim tok piksa olsem, long marit laip, meri tasol i ken karim bebi na givim susu,

tasol long wasim klos, kukim kaikai, karim wara na paiawut em ol man tu i ken mekim. Dispela kain skul i nupela tru long sampela ol yut i stap bikos kalsa na kastom bilong ol i tok, meri bai wokim olgeta wok na man em bai sindaun kisim isi taim na wetim kaikai tasol.

Rev. Arthur i kisim astok i kam long buk bilong Jenesis sapta 1, lain 27 em i tok, "God i wokim man long piksa bilong

em yet. Em i wokim ol long piksa bilong God yet, man na meri em i wokim ol."

Dispela tok em i olsem, man na meri, tupela wantaim i bin stap insait long namba wan man, Adam taim God i kamapim em. Olsem na meri i no aninit long man, nogat, Tupela i wankain tasol taim ol i pundaun long sin nau God i bringim dispela tok bilong bagarapim sindaun bilong tupela i kamap.

**BEYOND BOUNDARIES
SUNDAY, 6PM - 6.30PM**

Topic of the week:

HIV affecting young people in country and the measures now taken by the newly formed Youths Against HIV/Aids to address the issue.



FM100
PNG's Information & Music Leader

Text 1610

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMOOIMO 107.1	NAMATANAI 100.3	RABAU 100.8	TINFUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCO 100.3	RAMU 100.3	TOLLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATOA 107.5	NUKU 100.3	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIROU 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.5	TARI 100.5	WAUBULOLD 100.8
SOGIA 100.5	GOROKA 100.2	KIMBE 100.3	LIHR 100.3	MT. SOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Ol stail poto long Independens de!

MANDE Septemba 16 i bin 38 bonde anivesari bilong PNG na long olgeta hap bilong kantri, pipel i bin selebret long ol kain rot olsem putim kamap ol tumbuna singsing na danis, lotu, ol toktok ol bikman i mekim na moa. Lukim ol poto long ol selebren insait long Nesenel Kapitel Distrik.



HEPI RIYUNIEN: Francis Kila, Exodua Ningiku, Livai Grangari na Jeremiah Nathan i amamas long bung raun wantaim na selebret long Sir Pidik Park we ol bikpela selebren long NCD i bin kamap long Fraide inap long Mande. Foapela yangpela em ol eks Sen John's Tokarara i bin wokim Gred 8 Blu long 2011. Poto: Veronica Hatutasi



NONU SELEBRET: Tisa Mary Robin wantaim sumatin Essie Kentak i wokim Gret 4 na Edonia Luke em Get 6 sumatin long Nonu Independen skul i amamas long stap insait long selebren bilong ol long tingim 38 bonde anivesari bilong PNG. Poto: Veronica Hatutasi



GUTPELA TAIM: Femanda, Christine, Michaeline, Liko na Regina em ol sumatin i raun amamas long ol selebren long Sir Pidik Park, 5 Mail, NCD. Ol i amamas long fri edukesen bikos dispela i givimsans long moa sumatin i go skul na lainim long rit na rait na kisim save. Poto: Veronica Hatutasi



ANINIT LONG AMBRELA: Hait long bikpela san na selebret em yangpela mama Vanessa Aura bilong Hohola na bebi Roslyn, Raymond na Junia. Ol i amamas long raun lukim ol tumbuna singsing danis na ol laip ben i pairap long Se Pidik Park na amamasim planti tausen pipel i bin kamap long ol selebren. Poto: Veronica Hatutasi



AIR NIUGINI MERI: Sampela wokmeri bilong Air Niugini i putim PNG kala meri klos na redi long selebret. Poto: Ilan Kaprangi, Air Niugini Midia



LUKAUT LONG OL TAIS MANKI! : OL Asaro Madmen o taismanki bilong Nonu Pramerai skul i soim stret stail bilong ol taim ol bin selebret long Lahara Park, 4 Mail. Poto: Veronica Hatutasi

Givim gutpela stia long ol pikinini

INSAIT long Mosbi siti i bin gat planti selebresen i kamap long makim 38 independens aniveseri bilong kantri long Mande. Na ol Katolik manmeri bilong St Peter Chanel Peris long Erima i bin amamasim dispela bikipela de tu long stail bilong ol yet.

Long monging taim ol skul pikinini i bin singsing nesnel entem bilong kantri na mekim tok promis. Orait bihain, wangepa tisa bilong skul, Br Victor i bin go pas long opim de wantaim pre na bihain ol pikinini i apim plak bilong kantri. Na Orait bihain long en wangepa mama bilong peris, Anna Solomon i mekim sampela toktok long ol gutpela na nogut bilong 38 yia bilong independens.

Em i toktok moa i go long ol Katolik bilipmanmeri na askim ol long sanap strong long bilip bilong ol na stiaim ol pikinini long kamap ol gutpela sitisen bilong bihaintaim.

Ms Solomon i tok wanem samting yumi groim insait long laip bilong pikinini bilong yumi tude, em bai karim gutpela kaikai bilong kantri long bihaintaim. Em i tok i tru yumi olgeta i narakain, tasol yumi i wangepa long Kraiss.

Bihain long ol toktok, i bin gat ol kain kain singsing na danis bilong ol foapela rijon i

kamap. I bin gat resis namel long ol foapela rijon long makim Mis Peter Chanel 2013. Wan wan rijon i makim wangepa yangpela meri long resis.

Ol foapela yangpela i bilas gut tru long tumbuna bilas na ol lain i singsing wantaim na karim ol i kam antap long stej. Ol jas i skelim save bilong ol long tumbuna bilas ol i putim, na ol bekim long sampela askim. Yangpela husat i winim resis na kamap Mis Peter Chanel 2013 em Mis Mamose, Miriam Meros, husat i bilong Sentral na Sandaun provins.

I bin gat bikipela bung kaikai tu we peris i bin baim pik na givim long ol rijon i kuk na kaikai. Ol i bin senisim dis kaikai na putim wangepa dis tu long tebol bilong peris pris Pater Masianus na ol lain misineri na pren husat i bin kam stap na amamas wantaim ol pipel.

Olgeta selebresen i pinis wantaim bikipela donesen wan wan rijon i givim long baim ol sia na arapela samting bilong nupela haus lotu. Peris i wok long stretim olpela haus lotu nau long skruim i go bikipela moa. Mani ol foapela rijon i bin bungim na givim i go long Pater Masianus long dispela de em i klostu winim mak bilong K30,000.



OL RED INDIA LAIN O? Naispela stail bilas bilong tripela Momase rijen mama I mekim yumi I ting olsem ol I ol asples Ameriken Indian mama. *Poto: Anna Solomon*



Anna Solomon i sanap na autim tok tok long Independens de long Sen Peter Chanel long Erima we ol i amamasim dispela de antap long Maino Heduru Vokesenel Senta. *Poto: Sandra Amuru*

AGRICULTURE TRACTORS

- Slashers
- Disc Ploughs
- Disc Harrows
- Post Hole Augers
- And Other Attachments for Farming

90hp

70hp

50hp

*Photo for illustration purposes only

AGMARK MACHINERY

PORT MORESBY: 323 7957 | Digicel: 7215 0333 / 7217 9815
 LAE: 472 6324 KOKOPO: 982 8748 | email: machinery@agmark.com.pg

NASFUND FM100 TALKBACK SHOW

MONDAY - FRIDAY, 9AM TO 12PM

Special Independence Celebrations and Live Broadcast of 4th Tuna Forum, Solomon Islands.

FM100

PNC's Information & Music Leader

Studio: 323 3777 or 323 3999

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAU/BULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Spesel edukesen senta i kisim helpim

AUSENCO Faundesen bilong Australia i tokaut long wok bung o patnasip wantaim Buk bilong Pikinini (BbP). Buk bilong Pikinini i save lukautim ol skul laibreri bilong ol tarangu pikinini long planti hap long kantri.

Ausenco Faundesen i givim mani long sapotim wok bilong Buk bilong Pikinini laibreri long Ret Kros Spesel Edukesen Senta (RCSERC) long Pot Mosbi. I gat moa long 200 disebel pikinini i save kisim helpim long save bilong rit na rait long dispela skul. RCSERC i save helpim ol pikinini i yau pas, long kisim ol kain buk na ol narapela samting bi-

long skulim 70 pikinini long sain lenguis o spesel rot bilong yusim han long mekim ol sain bilong lainim ol namba na pasin bilong rit na rait.

Antap long dispela, Faundesen bai helpim tu Buk Bilong Pikinini laibrerien long kamapim wanpela awenes na edukesen progrem bilong ol disebel i go aut long arapela 13 laibreri insait long kantri. I gat planti kain pikinini olsem i stap long kantri, tasol ol i no save kisim gutpela helpim long kamap olsem ol narapela pikinini long skul.

Siaman bilong Ausenco Faundes, Zimi Meka i tok em i amamas

long sapotim dispela kain ogenaisesen i save helpim gut ol disebel pikinini long ol komyuniti.

"Mipela amamas long helpim ol pikinini long liklik we olsem," em i tok moa.

Meri husat i kirapim Buk bilong Pikinini, Anne-Sophie Hermann, i tok, "Buk bilong Pikinini i save bringim ol gutpela samting bilong skulim pasin bilong rit na rait i go long ol pikinini i no gat rot long painim helpim bilong skul."

"Mipela amamas tru long Ausenco Faundes i helpim ol disebel pikinini long Hohola Spesel senta, na tu long helpim i wok long

go long ol arapela hap we ol kain pikinini i stap," Anne-Sophie Hermann i tok.

Het Tisa na laibrerien bilong Buk bilong Pikinini long RCSERC i tok, "Mi laik kamapim wanpela sapotim netwok bilong ol pikinini i no save harim gut insait long Papua Niugini. Sapot bilong Buk bilong Pikinini na Ausenco Faundes i ken kirapim tingting bilong ol pikinini na famili long bilip strong olsem ol i ken kisim gutpela edukesen, na em i namba wan bikpela step."

Buk bilong Pikinini i bilip olsem literesi na helt i save wok wantaim. Olsem na Buk bilong Pikinini i wok

wantaim planti ogenaisesen long helpim long kisim ol bikpela tok bilong helt i go long ol pikinini. Ol i save strongim toktok bilong ol bikpela sik i save kamapim dai olsem, sike HIV/AIDS, kolera, TB na malaria.

Ausenco Limited em i wanpela ensinia, konstraksen na menesmen kampani i stap long Australia. Sekuriti Eksens na i save givim servis long ol risos na eneji sekta. Bikpela tingting bilong Ausenco Faundes em long kamapim gutpela wok i ken senisim laip bilong ol pipel long ol komyuniti we kampani i save wok long en.

NCD Gavana luksave long haiskul kalsa de

Lucy Kapi, bilong NCD media i raitim

GAVANA bilong Nesenel Kepitel Distrik, Powes Parkop i bin mekim ol sumatin, tisa na mama papa bilong Holi Spirit Haiskul long Bogia Distrik, Madang, i amamas long taim em i go stap wantaim ol long skul kalsa de.

Skul i bin askim Gavana Parkop long go stap wantaim ol long kalsa de bilong ol long Sarere 14 Septemba. Em i bin strongim ol sumatin wantaim mama papa bilong ol long luksave olsem edukesen em i bikpela samting.

Mista Parkop i bin tok amamas long haiskul i holim kalsa de long mekim sampela mani bilong skul, tasol em i tok edukesen tasol em i ki bilong gutpela sindaun bilong ol long bihaintaim.

Skul i kalsa de i kamap olsem fan reising bilong ol, tasol ol i bungim selebresen wantaim 38 independens de. Ol sumatain i bin soim tu kain kain stail bilong singsing i kam long wan wan kalsa bilong ol stret.

Het tisa bilong skul, John

Paul Malangen, i tok ol i tingting long holim bikpela kalsa de long tingim independens de, bikos kalsa bilong Bogia i wok long dai isi, isi.

"Mipela lukim kalsa olsem wanpela rot bilong ol sumatin i lainim gutpela pasin. Na mipela yusim dispela taim long kamapim sampela mani bai helpim mipela long bringim level bilong skul i go long nesenel haiskul level," prinsipel i tok.

Em i tok, taim ol sumatin i pinisim gret 10, planti i no gat spes long gret 11 long Malala Sekenderi Skul.

Em i tok, tingting bilong ol long apim level bilong skul, em i go gut tru wantaim plen bilong nesenel gavman. Populesen bilong kantri i wok long gro olsem na nesenel gavman i kamapim ol top-ap skul.

Em i tok NCD tu i wok long bihainim dispela pasin bilong apim level bilong ol skul. I no longtaim i go pinis em i bin apim pinis level bilong Charles Lawanga na Koiari Park Sekenderi Skul.

Em i tok, Holi Spirit Haiskul i bihainim stret plen bilong gavman, olsem na ol i mas

wok strong yet long helpim edukesen bilong ol pikinini

Em i tok, "Nesenel Gavman i save givim K10 milien i go long ol wan wan distrik long kantri, olsem na yupela i mas askim memba bilong yupela long helpim yupela. Yupela putim sabmisen bilong yupela, na bai yupela i kisim ol mani bilong yupela."

Mista Parkop i tokim ol sumatain olsem, soim tredisen na kalsa bilong wan wan ples i gutpela, tasol moa long dispela em long strongim gutpela pasin bilong rispek na sanap bung wantaim.

"Yumi wanpela komyuniti i mas gat rispek na helpim narapela. Toksave long ol pikinini long ol gutpela pasin tumbuna bilong yumi, na toksave em i gat wanem kain mak insait long yumi," em i tok moa.

Het tisa bilong skul i tok, em i bin singautim ol arapela palamen memba long kam long dispela kalsa de tasol nogat wanpela i bekim. Olsem na em i tok bikpela tenkyu long Mista Parkop long em i wanbel na i kam long kalsa de bilong skul.

Memba baim skul fi bilong ol sumatin

By Paulus Tali

OL studen bilong Kabwum husat i skul long Balob Tisa Koles, i amamas long memba bilong ol, Bob Dadae, husat i givim sampela mani long baim skul fi bilong ol.

Wanpela opisa bilong Mista Dadae, Immanuel Oki, i bin makim maus bilong memba na i givim K65, 975.00 i go long Balob Tisa Koles long Lae, Morobe.

Dispela mani i kam long Mista Dadae i mekim ol studen i kisim gut win, long wanem, planti bilong ol i gat bikpela hevi long skul fi na ol i wok long wari i stap.

Dispela em i no namba wan taim bilong memba bi-

long Kabwim i mekim olsem. Em i baim skul fi bilong ol studen bilong Kabwum husat i stap long ol tisa trening skul olsem Balob, Madang na

Gaulim Tisa Koles, na long Yunitek long Lae, Yunivesiti bilong PNG, Yunivesiti bilong Goroka na ol Sekenderi skul olsem Wasu na Makam Veli.

Mista Oki, i tok opis bilong Mista Dadae i helpim ol student bikos em i laik ol sumatin i pinisim skul, na go bek wok long ol skul insait long bus.

Em i askim ol studen long wok strong na kamap long mak bilong kisim wok na go bek long helpim ol pipel bilong Kabwum yet.

Het tisa bilong Balob Tisa

Koles, Jerry Hendingau, i tok amamas long Mista Dadae i mekim dispela pasin long tingim ol pikinini Kabwum insait long ol koles na skul.

Em i tok planti taim ol studen i save bungim hevi bilong skul fi na ol i save lusim skul, na go bek long ol asples bilong ol.

"Mi amamas tru long lukim Mista Bob Dadae i mekim gutpela wok long helpim ol sumatin long stretim gutpela sindaun bilong ol Kabwum pipel," em i tok.

Mista Oki i makim maus bilong memba na tok memba bilong ol Kabwum i mekim dispela pasin long kirapim ol yangpela bilong Kabwum i ken kamap ol gutpela lida bilong tumora.



Wanpela sumatin bilong Tokarara Sekenderi Skul na Hai Komisin bilong Australia Mis Deborah Stokes rausim ol pipia long skul

Hai Komisin strongim 'Klinim Wol' Kempein

HAI Komisin bilong Australian long PNG i wok bung wantaim Tokarara Sekenderi Skul long strongim global 'Klinim Wol 2013' kempein.

Long las wik Fraide, Hai Komisina bilong Australia long PNG, Deborah Stokes na sampela lain bilong Hai Komisin i bung wantaim 700 sumatin na ol tisa long mekim klinim wol kempein.

Long dispela taim, Australia Hai Komisin i givim 10-pela wil dram bilong tromoi pipia, ol rek, raba hos

na ol ol pipia beg na ol han glab.

Mis Stokes i tok klia long wok bilong wan wan long lukautim graun bilong yumi long rausim ol pipia na putim stret long ples bilong tromoi pipia. Em i tok long taim yumi mekim olsem, bai yumi strongim ol komyuniti bilong yumi na i gutpela sapos wan wan i klinim ples na lukautim graun na bus ol i stap long en.

"Em i wok bilong yumi olgeta long no ken larim ol pipia i pundaun nabaut.

Long dispela de, mi hop olsem ol sumatin bai tingim yet long tromoi ol pipia gut na long lukautim ol samting bilong pablik ples. Mi hop bai ol i ken karim toksave tu i go long ol narapela lain long komyuniti." Mis Stokes i tok.

'Klinim wol' em i kempein bilong lukautim bus na graun long wan wan komyuniti insait long wol. I gat klostu olsem 35 milien volantia long 130 kantri i save mekim dispela kempein long olgeta yia.



Ol yangpela meri Madang i putim nesenel kala dres na kisim Gavana Parkop long Madang ples balus. Foto: Lucy Kapi



Yut, Meri na Famili

**Pastor
Barbara Lunge**

Yu no ken laikim tumas samting bilong bodi

"TRU, mipela i save stap long dispela graun, tasol mipela i no save pait olsem ol man bilong graun. Olgeta samting bilong pait mipela i holim, ol i no samting bilong dispela graun. Nogat. Ol i gat strong bilong God, na ol inap brukim ol strongpela banis bilong birua. Mipela i save daunim olgeta kain tingting na giaman tok i save pasim rot bilong ol man i laik save long God. Na mipela i save kalabusim olgeta tingting bilong ol man, bilong mekim tingting bilong ol i bihainim laik bilong Kraiss." 2 Korin 10:3-5.

"Sapos wanpela man i laikim ol pasin bilong graun, orait em i no save laikim tru Papa. Yumi save, olgeta pasin bilong ol man bilong graun, em pasin bilong bel kirap na aigris na bikhet. Nogat. Ol i pasin bilong graun tasol. Na dispela graun bai i pinis, na olgeta pasin bilong em ol pasin bilong bel i kirap na aigris, ol tu bai i pinis wantaim. Tasol man i bihainim tok bilong God, em bai i stap oltaim." 1 Jon 2:15, 16, 17.

Kristen i gat tripela bikpela birua long winim pastaim long ol i gat gutpela laip. Em laik bilong bodi, laikim bilong samting bilong graun na devel o satan. Man i mas kilim bodi long diwai kros na em i mas dai pastaim na bihainim bai spirit man i ken winim laikim bilong graun na satan. Kristen i ken kilim i dai laik bilong bodi sapos em i bihainim tok bilong God olgeta taim.

Buk 2 Korin 4:4 i tok, "Satan, em i giaman god bilong dispela graun, em i bin pasim tingting bilong ol dispela man i no bilip, na lait bilong gutnius bilong marimari na sori bilong Kraiss, em i no inap i go insait long bel bilong ol. Olsem na ol i no save lukim Kraiss, em i piksa tru bilong God."

Rom sapta 14: 17,18, i tok olsem, "Kingdom bilong God i no pas long kaikai na dring. Nogat. Pasin tru bilong kingdom bilong God em i stretpela pasin na bel isi na pasin bilong amamas Holi Spirit i save kamapim. Man i bihainim dispela pasin na i mekim wok bilong Kraiss, bai God i laikim pasin bilong em, na bai ol man i tok amamas long em."

"Ol brata, mi tingting long bikpela marimari bilong God na mi tokaut strong long yupela olsem, yupela i mas givim bodi bilong yupela long God olsem ofa. Na taim yupela i stap laip bai yupela i stap ol manmeri bilong God stret na bai yupela i mekim ol pasin God i laikim. Yupela i mekim olsem na yupela i ken lotu tru long God. Na yupela i no ken wokabout wankain olsem ol man bilong dispela graun. Nogat. Yupela i mas larim God i mekim tingting bilong yupela i kamap nupela tu. Olsem na bai yupela inap long save tru long laik bilong God. Bai yupela i save long ol pasin i gutpela na long ol pasin God i laikim tumas na long ol pasin i inap tru na i stret olgeta." Rom 12:1-2.

"Yupela i mas larim God i stap king bilong yupela, na kisim stretpela pasin bilong em, na bai em i givim dispela olgeta arapela samting tu long yupela." Matyu 6:33.

Sapos yu laik save moa, yu toktok wantaim wokmeri bilong God, Evangelis Barbara Lunge long fon namba 71075829/6331426, o rait i kam long P.O.BOX 3063. BOROKO, NCD, PAPUA NEW GUINEA.

Strongpela bisnismeri long Wes Taraka

PLANTI manmeri long Lae siti long Morobe i save pret na tingting olsem Wes Taraka em wanpela ples nogut tru bikos bikhet pasin na raskol i pulap long hap.

Tasol i gat gutpela stori tu i stap long dispela ples. Long Wes Taraka i gat wanpela strongpela meri bilong Tufi long Oro provins husat i wokim bisnis long samapim klos na ol arapela samting na salim. Dispela meri nem bilong em Molly Sally na em i bosmeri bilong Tapa Kloting na Fesion Disain.

Molly em marit long Bob Sally bilong Chimbu provins na tupela i gat 4-pela pikinini. Tasol dispela meri Tufi em strongpela meri stret bikos em i statim bisnis 13 krmas nau na bisnis bilong em i save wokim ol kain kain yunifom bilong ol wokman meri na tu ol skul yunifom bilong ol sumatin na yangpela pikinini.

Molly i bin statim embroderi bisnis kampani bilong em long 2002 wantaim wanpela mesin bilong samap tasol. Tude em i gat 49-pela mesin bilong samap. Na em i gat 30-pela wok lain husat i save samapim ol klos bilong ol kain kain kampani i putim oda olsem ol sekuriti kampani, industrial yunifom, ol gavman dipatmen na ol skul. Em i save oda long planti ol samting bilong wok long Super Value Stua long Lae.

Planti lain i save askim em bilong wanem na em i kirapim bisnis bilong em long Wes Taraka, we em eria bilong planti trabel na raskol pasin. Tasol Molly i save tokim ol olsem: "Rot long kisim graun na wokim bisnis long Lae em hat tru long kain smol na medium bisnis (SME) lain olsem mi yet. Olsem na mi mas sanap strong wantaim strongpela tingting na kirapim bisnis long eria mi stap long en na mekim i go bikpela na muv i



Molly Sally wantaim man bilong em Bob i soim sampela prodak ol i wokim long faktori bilong em long Wes Taraka long Lae

go aut long ol arapela eria long Lae siti,"

Molly i bin skul long Taraka praimeri skul long 1990 i go 1995. Bihain long en em i go skul long CODE (Koles ov Distens Edukesen) long Eriku long 1996 i go 1999. Bihain long dispela em i stap tupela yia nating na long 1998 i go 1999, em i go skul long Komesal Trening Koles (CTC) long lainim wok bilong kompiuta na buk-kiping. Bihain long dispela em i go wok wantaim Warner Shand Loya long tupela yia.

Bihain long dispela em i go wok wantaim lokal sekuriti kampani Kuima Sekuriti Sevises. Long hap em i bungim man bilong em Bob, husat em menesa bilong kampani long dispela taim na tupela i marit na kamapim 4-pela pikinini. Bisnis bilong Molly i soim kala na strong bilong en pinis long industrial siti bilong Lae na i resis wantaim ol arapela kampani bilong samapim ol klos. Tasol bikpela salens em no gat inap laplap saplai long go wantaim

planti ol askim ol kastoma i laikim.

Molly i tokaut olsem long tingting bilong em yumi ken daunim lo na oda sapos ol yut o yangpela manmeri i gat wok long mekim na tu traim long kamapim wok long helpim ol yet long kamapim gutpela sindaun long komyuniti bilong ol wan wan.

"Lo na oda i stap long han bilong ol manmeri long komyuniti. Yumi mas soim pasin bilong rispek na soim Kristen pasin na helpim wanpela arapela long kamapim gutpela soaiti," Molly i tok.

"No gat wanpela ples em i nogut. Em pasin bilong wan wan liklik lain tasol i bagarapim nem bilong komyuniti, strit o ples ol i stap long en,"

"Yumi mas givim gutpela skul long ol pikinini bilong yumi long ol gutpela pasin na dispela bai kamapim gutpela senis long taim bihain," Molly i tok.

Em i tokaut tu olsem man bilong em Bob i helpim nau long wokim wanpela trening skul insait long eria ol i stap long en.

"Mipela laik helpim moa yangpela man na meri long Morobe long stap strong long Morobe laip na kamapim gutpela sindaun long sosel na ekonomik developmen long wan wan ples na komyuniti bilong ol," Molly i tok.

Molly Sally i laikim olsem ol yangpela manmeri i no ken tingting tasol long stap na wokim wok long haus tasol. Ol i mas kamapim samting we i ken helpim ol arapela tu insait long wan wan komyuniti bilong ol.

Nau olsem em i harim toktok bilong Gavman long Pablik-Praivet Patnasip (PPP) insait long SME program, em i amamas sapos provinsal na nesenel gavman i sapotim ol wok bilong em long helpim ol tarangu meri na ol yangpela meri long Morobe provins.

Man bilong em Bob Sally i statim tu wanpela sekuriti kampani i no long taim i go pinis ol i kolim Dominion Sekuriti Sevises bihain long em i risain long wok bilong em.

Seif Siti program stopim bikhet pasin

SEIF Siti program bilong ol bikpela na ol yangpela meri long Pot Mosbi siti i soim stail bilong ol long 20 opisa bilong Seif Siti husat i kam long 5-pela provins, long taim ol i bin bung long tupela de.

Papua Niugini, Australia Lo na Jastis Patnasip Program (PALJP) i luksave olsem Seif Siti program em i wanpela gutpela piksa bilong daunim na stopim pasin bilong brukim lo insait long Pot Mosbi siti. Olsem na las wik, ol i kisim ol lain long provins i kam stap insait long tupela de konprens..

Nesenel Kepital Distrik Komisen, (NCDC) wantaim UN Wimen i go pas long Seif Siti

program long ol bikpela maket bilong Gerehu na Gordons. Program tim i soim ol lain i kam long konprens long kain kain we ol i save mekim long stopim bikhet pasin. Ol yet bai lukim na kisim wanem stail em inap long wok long ol siti o taun bilong ol.

"I gat luksave bilong Seif Siti program, olsem em i go pas tru, insait long Pot Mosbi long painim ol nupela we bilong daunim na stopim pasin bilong brukim lo. Em i karamapim tu pasin bilong paitim na bagarapim ol mama na yangpela meri. Olsem na mipela i amamas long soim ol wanwok bilong mipela i kam long narapela hap bilong kantri," Seif Siti Tim Lida, Alethia Jimenez i tok.

Em i tok, "As tingting bilong Seif Siti program em bilong kamapim gutpela ples we ol meri bai i no ken pret long salim ol samting long maket we na no gat man bai kam bagarapim ol, o maket bilong ol. Wantaim dispela program, ol man tu i no ken pret long wokim maket bilong ol."

Em i tok, "Seif Siti i wok bung wantaim polis long kamapim ol stail bilong stopim pasin bilong brukim lo insait long ol maket bilong Pot Mosbi. Ol i strongim ol sampela sistem bilong polis nau i stap pinis, olsem polis patrol, rot bilong putim ripot bilong hevi i kamap, na long stretim ol polis pos na ol toilet

long maket." Ol 20 manmeri husat i kam long konpres em ol taun meia, town menesa, mausman bilong komyuniti na ol komyuniti developmen opisa bilong Daru, Kerema, Kiunga, Mendi, Pongpoda na Tari. Ol i bin go lukluk raun long Gerehu na Gordons maket we Seif Siti program i stap.

Ol memba bilong Seif Siti tim, em Dairekta bilong Komyuniti Polis, Sif Suprintenden, Gerry Frank, ol Polis Stesin Komanda, na ol opisa bilong Pablik Seifiti Yunit, wantaim ol NCDC opisa husat i save lukautim maket, na Jenda Ikwiti Des wantaim ol woklain bilong UN Wimen.



KONSALTESEN: Dokta George Tanael i toktok long Casper Gelu na edvaisim em long wanem samting bai mekim bihain long em i kisim blut na suga level tes. Foto: Michelle Carumba

Sen Charles Lwanga kirapim nupela helt plen

Veronica Hatutasi i raitim

WANPELA peris insait long Pot Mosbi Katolik Adaiosisi statim wanpela program long helpim ol bilip manmeri bilong peris bilong em long stap helti na ol i ken mekim spirituel na fisikel wok wantaim.

Sen Charles Katolik peris long Gerehu, i bin statim "Helt Sek Plen Progem" bilong em long las wik Sande, Septemba 15 we wanpela Filipin dokta na tupela yangpela dokta man na meri i bin helpim long sekim suga na blut level bilong namba wan grup.

Dokta Jorge Tanael bilong Filipins husat i stap planti yia pinis long PNG na i wanpela dokta long Sen Mary's Medikal Senta.

Em wantaim tupela yangpela marit dokta i bin sekim na edvaisim samting olsem 50 perisina bihain long lotu.

Siaman bilong Sen Charles Lwanga Peris, Caspar Gelu, i tok "tingting long peris i wokim helt plen na singautim wanpela dokta long wokim ol helt sekap na tu, givim ol edukesen awenes long ol arapela sik i wok long bagarapim na kilim ol manmeri tude i bin kamap las yia taim wanpela memba bilong peris i bin pondau nating na dai.

"Mipela i laki long kisim Dokta Tanael na lain bilong em i kam long namba wan taim na holim ol konsaltesen insait long peris.

"Las wik, ol perisina i bin givim nem bilong ol i lukim dokta na nau, Dokta Tanael na lain bilong em i wok long givim fri sekap long suga level na blut presas.

"Sapos ol i sekim na blut presas na suga level i stap antap abrusim mak, ol bai givim ol preskripsen pepa na ol bai baim ol marasin long ol famasi o kemis long siti.

"Taim mipela i toksave long peris pris bilong mipela, Pater Mark Kautu, long plen, em bin givim tok orait na namba wan konsaltesen i stat tude.

"Peris Kaunsil bai toktok moa long dispela samting long bung bilong em.

"Wanpela long ol samting bai kaunsel i lukluk long em long givim sampela mani i go long dokta long baim marasin long givim long ol perisina i gat sik, bihainim ol sekap.

"Mipela i laikim ol perisina i mas stap helti long fisikel na mekim wok long spirituel sait na tu, lukautim ol yet na ol famili bilong ol," Mista Gelu i tok.

Long wankain taim, Dokta Tanael i tok em i laik helpim komyuniti na ol lain i painim hat taim long go long haus sik long kisim ol helt sevis.

"Mipela i laik lukim ol siklain insait long ol komyuniti i no gat inap mani long go sekap

long haus sik long ol sik olsem suga na blut presas, ol mama i gat bel, na ol pikinini.

"Mipela i laik wokim awenes long ol rot bilong bihainim long stopim sik TB bipo em i kamap, malaria, taipoid, sik pekpek wara long kain program olsem.

"Bihain long wanpela mun, bai mipela i bung wantaim Peris Kaunsil na toktok long ol helt plen bilong mipela long peris. Mipela i gat plen long wokim program long lukim na sekim ol bikpela manmeri, ol mama i gat bel na ol pikinini.

Komyuniti i mas resim o kamapim mani long long karimaut dispela kain komyuniti program," Dokta Tanael i tok.

Em i tok wanpela rot long stap helti na longpela laip em long, kaikaim ol rait kaikai olsem ol prut, kumu na ol gaden kaikai, wokim eksasais long 20 na 30 minit olgeta de na ol lain i stap long marasin i mas kisim marasin bilong ol.

WeCare i kisim luksave long Asdaiosis ...Roteri Klab givim gutpela sapot

BIHAIN long samting olsem 10-pela yia, WECare grup i wok long strongim wok bilkong em na tu, kisim luksave bilong Katolik Sios.

Long wankain taim tu, em i wok long kisim mani sapot na helpim long Roteri Klap long Mosbi na Adelaide long Australia.

Man i kirapim dispela Non Gavman Ogenaisesen (NGO) long helpim ol pikinini i raun nabaut long strit na tu, ol papamama i dai na ol no gat lain bilong lukautim ol na putim ol long skul em Pater John Glyn, wanpela Katolik pater.

Pater John i stap mekim wok misineri na tisa long PNG moa long 40 krismas.

Bihain long em bin wok long Nu Ailan Provins long planti krismas stret stat long taim em bin yangpela man, em i kam long Mosbi samting olsem 13

yia i go pinis.

Taim Jubili Katolik Sekonderi Skul i op long Nesenel Kapitel Distrik, em bin go insait na em i stap wok yet long hap olsem Saplen na wanpela tisa tu.

Long Jubili, em bin kirapim wanpela Brekfas Klap na moa long 10-pela yia, dispela i stap yet.

As tingting Pater John i bin kirapim klap em long helpim ol sumatin i kam long ol tarangu famili na tu, ol lain i no gat kaikai long haus long kaikai brekfas na bai holim bel na ol i skul gut.

Brekfas Klap i gat ti, mailo, suga, milk, ol siri, rais, tinmit, beik bin, spageti, kiau ol sumatin i save kaikai namel long 6.30 am na 7.30 am.

Long planti yia, Pater John i save yusim mani bilong em yet long baim ol brekfas kaikai.

Nau Jubili skul i papa long dispela klap na ol i ranim yet i stap.

Long sait bilong WeCare, Pater John i tok ogenaisesen i wok long kisim gutpela sapot na mani na ol arapela helpim i kam long Roteri Boroko na Roteri Adelaide, Australia.

Dispela i bihainim wanpela presentesen we Pater John na narapela wanwok bilong em i bin mekim long ogenaisesen long mun Ogas long Mosbi.

Pater John i tok Adelaide Roterien lain i wok long salim sampela volantia bilong ol i kam helpim ol Lasalien na WeCare i kisim ol lukluk long ol WeCare grup na wok ol i mekim long NCD.

"God i ken blesim Roteri bikos nau, ol i helpim mipela long planti samting.

"Ol pren bilong mipela long Ireland (Pater John i bilong kantri Ireland) na Australia i

helpim mipela gut wantaim mani na ol arapela donesen. Na mipela i no save stop long tok tenkyu long Bikman," Pater John i tok.

Long wankain taim, Pater John i amamas olsem bihain long 10-pela yia, Katolik Asdaiosis long Pot Mosbi i luksave long wok WeCare i mekim, na askim sapos wanpela i makim Asdaiosis long Bot bilong ol, na tu, sapos ol misineri i ken helpim long wok bilong WeCare.

"Mipela i amamas long kisim luksave long sios bikos taim mi statim dispela wok long 2002/3, Asdaiosis i bin edvaisim mi long no ken mekim, tasol taim i senis nau

"Ating kisim luksave nau long Asdaiosis i ken mekim sampela Katolik peris i karimaut ol pastorel wok namel long ol tarangu namel long ol," Pater John i tok.



Hanuabada i no olsem bipo

TRIPLELA yia i go pinis, taim mi nupela yet long Hanuabada Peris, mi ken go long olgeta kona bilong Hanuabada inap long biknait. Mi no gat pret. Narapela manmeri, meri na pikinini tu i ken wokabaut fri inap long biknait. Dispela fridom bilong wokabaut i no stap moa.

I no gat kontrol bilong bikman/sif na kaunsil bilong ples. Dispela i mekim ol yangpela man na meri i yusim fridom bilong ol long wokim hom bru, stim long dring na spak. Wankain taim tu, mariwana o spak brus i kamap olsem 'nomal' bisnis long maket olsem kaukau, banana o narapela gaden prut.

Stim o hom bru na mariwana i bin kisim fridom bilong ol manmeri bilong Hanuabada. Olgeta i save wanem hap ol i wokim hom bru na salim mariwana. Tasol i no gat wanpela kaunsil, polisman, mejistret o manmeri bilong komyuniti i stopim. Sampela i stori long mi: "Polisman na gavaman lain i save baim hom bru na dring wantaim manmeri bilong ples." Trabel i kamap long skul planti taim. Ol i bin pasim skul planti taim. Tasol ol manmeri i no lainim yet.

Long Sande namba wan de bilong mun Septemba 2013, i gat bikpela trabel i kamap long fron bilong Haus Lotu i go antap long Goldie Strit. *Trabel i stat long ten klok nait, na pinis long ten klok moning tasol. Sampela yangpela bilong Simbu i stap long Goldie Strit i bin spak na kisim buai long sampela yangpela meri bilong Hanuabada taim ol i kam baim buai long fron bilong Sios. Taim yangpela meri i laik kisim bek, yangpela boi i no laik givim bek na tok nogut na mekim nogut long yangpela meri. Yangpela meri i go na tokim papa bilong ol. Papa bilong ol i kam krosim yangpela spakman bilong Simbu, na sutim leg bilong ol.*

Olgeta Simbu i stap long Goldie Strit i sapatim yangpela spakman na pait wantaim ol Hanuabada. Hunaubada lain i kam na bagarapim maket bilong ol Tari long fron bilong haus lotu, blokim rot i go long Hanuabada na i go long Goldie Strit, brukim kapa bilong stua na yusim long pait wantaim Simbu.

Ol Simbu i liklik lain, tasol ol i no prèt long pait wantaim planti lain bilong Hanuabada. Ol i yusim ston, home made gan, diwai, spia, bus naip na kain kain samting long pait wantaim narapela narapela. Pait i go long nait inap long tulait long ten klok. Sumatin, wokmanmeri, publik sevan i no inap go long skul o wok, bikos tupela sait i sanap na blokim rot. I no gat wanpela manmeri o kar i go i kam.

Planti samting i bagarap taim tupela i tro-moi ston i go i kam. Sampela glas windo bilong haus lotu i bruk. Haus bilong Sista i kisim planti ston moa moa yet na sampela ston i brukim wol bilong haus bilong Sista. Bikos lain bilong Hanuabada i yusim ples bilong haus lotu olsem ples hait.

Long Mande moning, mi ringim Sista, sapos mipela i wokim Misa o nogat. Sista i tokim: "Pater, no ken kam. Ples i no seif. Yumi bai misa long apinin sapos ples i kamap orait." Laki mi no go daun long haus lotu. Sapos mi bin go, bai mi bungim stret ol Hanuabada i kam antap long atekim ol Simbu. Bikpela lain tru bilong Hanuabada. Tasol taim Simbus i atekim ol bek, olgeta i ran i go daun.

Planti lain bilong Hanuabada i kisim bagarap long ston. Lain bilong Simbu i kisim liklik bagarap tasol.

Inap long tude, i no gat wanpela lida i kam kamap long stopim na kamapim bel isi. Nogat tru!

Pasin birua i stap namel long tupela lain yet. Wanem taim bai pasin birua i lusim kantri bilong yumi? Sapos yumi i no klia tumas long mining bilong "Independen", na bihainim laik bilong wan wan long laip bilong yumi, gutpela taim bai i no inap kamap long kantri bilong yumi PNG, maski yumi yet i tok Kristen kantri.

WOL NIUS LONG POTO



Ol lain femili bilong 2-pela pota husat i dai long Back Cat Track i rapim graun malumalu long pes i soim sori na belhevi bilong ol.

PNG i makim 38 yia indipendens tasol i lus tingting long ol yut

Ol yut bilong Papua Niugini i tok taim kantri i makim 38 indipendens selebren bilong en, tasol Gavman i no luksave long ol.

James Lunge em wanpela sumatin long Jubilee Katolik Sekenderi Skul long Pot Mosbi, i bin mekim dispela hap tok insait long wanpela bung, em Sharp Talk i bin kamapim wantaim het tok SHAPING OUR FUTURE.

James Lunge i tok bikpela wari ol i lukim em long planti grup bilong ol yut i stap, tasol ol i no lukautim planti ol yut bilong tude.

Em i tok tu olsem maski i gat ol sevis bilong ol yut olsem Nesenel Yut Komisin, ol yangpela pipel i no gat wanpela gutpela samting long helpim ol long bihainim gutpela laip na sindaun long kantri.

Ol i sutim tok long gavman long lus tingting long ol.

Famili bilong Agilo i sutim tok long kampani

Famili bilong wanpela man bilong karim kago husat i bin dai bihain long ol i bin bungim birua long Black Cat Track long wik i go pinis i sutim tok long kampani olsem ol i no mekim wanpela samting long helpim Lionel Agilo.

Lionel Agilo em i namba tri PNG man i dai bihain long em i kisim ol bagarap long Black Cat Track long Morobe provins.

Lionel Agilo i bin dai long Sande bihain long ol bikpela birua em i bin kisim long bodi bilong em. Ol i bin katim het, ol han na tupela lek bilong em. Em i bin kisim bikpela bagarap tru winim ol narapela husat i bin kisim taim tu. Brata bilong em, Nick Agilo, i tok dispela kampani PNG Trekking Adventures i no bin givim wanpela helpim long taim ol i bin bungim birua long Black Cat track.

PNG Trekking Adventures i tok em i no isi long painim sampla gutpela rot bilong helpim ol dispela lain i kisim bagarap long painim gutpela helpim long haus sik. Toktok bilong Nick Agilo i kamap long wankain taim we ol polis i holim na kalabusim siks-pela pipel em ol i ting i bin kamapim dispela trabel.

Abbott givim wok minista long wanpela meri tasol

Sinia Liberal palaman memba bilong Australia Bronwyn Bishop, em ol i ting bai kamap olsem Spika bilong Haus, i tok pasin Praim Minista Tonny Abbott i mekim long makim klostu olgeta man olsem ol minista em i orait. Dispela kabinet i gat wanpela meri tasol, Julie Bishop.

Bronwyn Bishop i tok ol meri i ken go long kabinet sapos ol i gat planti save long wok Mista Abbott i bin tokaut long nupela kabinet bilong em wantaim wanpela meri tasol, Julie Bishop. Ol i ting em bai kamap nupela Foren Afeas minista.

Mis Bishop i wanpela tasol long siks-pela meri long olgeta 42 ministri bilong gavman.

Dispela tingting bilong Mista Abbott i bin kirapim planti belhevi i kam long ol meri insait yet long Liberal Pati. Meri husat i winim Australian of the Year, Ita Buttrose, i tok dispela i soim olsem ol man i save go het yet olsem ol i bos lain long kantri.

Bronwyn Bishop i tok ol i mas makim ol meri sapos ol i gat planti save na strong long holim ol dispela bikpela wok, na em i ting bai ol i makim sampela meri husat i stap long bekbens long kisim ol bikpela wok long gavman.

Polis i holim ol pipel long trabel long Black Cat Track

Papua Niugini polis i holim pinis foapla pipel bihain long indai bilong tupela man bilong karim ol kago na ol turis bilong Australia na Niu Silan na ol narapela lain i kisim birua long Black Cat Track long Morobe provins las wik.

Suprintenden Dominic Kakas, husat i go pas long PNG Polis Media Yunit long Pot Mosbi i toktok wantaim Pius Bonjui bilong ABC Redio Australia PNG Sevis.

Ol nius ripot i tok ol pipel bilong ples i bin kilim wanpela man long wanem ol i sutim tok long em olsem em i bin haitim ol dispela man.

Sevenpela man bilong Australia, wanpela man bilong Nu Silan na ol PNG wokman bilong karim kago i bin bungim birua taim ol i bin wokabaut na bihainim Black Cat Track long las wik Tunde.



UNITED STATE: Wanpela helikopta i flai antap long wanpela bilding we ol opisa i wokabaut antap long Washington Nevi Yad. Olsem 13 manmeri i dai bihain long wanpela US neval risevist i sutim ol long navy yad. Dispela birua i karim bikpela fos bilong polis na ol federal ajen i kam na karamapim Washington Nevi yad we polis i wok long sekim sapos i gat narapela man tu wantaim militeri yunifom i wok long sut na kilim dai ol manmeri long hap i stap.



MEXICO: Hariken Ingrid na Tropikol Stom Manuel i bagarapim Mexico, 34 i dai na namba i go antap yet. Ol memba bilong Mexican Nevi i pasim gut hap ples bilong bikpela haiwara klostu long ples Acapulco long stopim ol stilman na meri. (AFP) Wanpela maunten i kapsait i kamdaun antap long wanpela bas insait long Mexico taun na kilim 12-pela manmeri we namba bilong ol dai i go antap long 34.



INDIA: Badrinath Singh na Asha Devi, papamama bilong New Delhi reip victim Nirbhaya, i amamas tru disisen bilong kot long givim det sentens long ol man husat i bagarapim pikinini bilong ol. Mipela no inap sori long ol dispela lain husat i reipim pikinini bilong mipela na kilim em i dai long las yia. Ol i bin mekim dispela toktok taim ABC i intavium tupela las wik.



AUSTRALIA: Robert Hoge em bon wantaim lek nogut na traipela mama bilong tuma long pes bilong em. Em wanpela man we taim em i kamap, mama bilong em i tok, mi no inap karim dispela bebi go long haus, tasol nau Robert i save bilong wanem na mama bilong em i tok olsem na em i sori long mama bilong em. Mista Hoge i bon long Brisbane haus sik long yia 1972 wantaim tupela lek nogut na tuma long pes bilong em. Em i namba 5 pikinini long Mary na Vince Hoge, em i tok nau mama bilong em i amamas tru long daunim dispela toktok em i mekim bipo. Taim mama bilong em i lukim bebi Hoge wantaim tupela lek nogut na traipela tuma long pes i karamapim pes na mekim ai i go saitsait i mas mekim mama bilong mi i wari tru, Hoge i tokim ol Australian Story. (ABC: Tim Leslie)

Painim ol arapela rot bilong bosim gut buai long Mosbi siti



Bikpela selebresen na amamas bilong 38 independens aniveseri i pinis nau na laip bilong yumi i kamap nomal gen. Yumi rausim ol siot, meri blaus, laplap na kep i gat kala bilong PNG na yumi stap olsem ol pipel bilong wan wan provins na ples.

Pasin bilong bung wan-taim, ahebou, na yunait i lus gen. Ating planti bilong yumi i no inap tingim wanem kain ol stia toktok ol lida i bin mekim long taim bilong dispela selebresen. Em i no nupela, bikos ol pipel i les long harim wankain toktok i kamap long olgeta independens selebresen.

Long taim ol pipel long ol arapela hap long kantri i wok long singsing na kaikai na amamasim independens, ol pipel bilong Mosbi i wok long wari nau long wanem samting bai kamap long 1 Oktoba. Long olgeta kona bilong siti we i gat ol tebol maket bilong salim buai, ol pipel i wet tasol long lukim bikpela tambu NCD Gavana Powes Parkop bai kamapim long stopim buai insait long siti.

Astingting bilong Gavana i stopim buai em bikos long ol pipia na spet bilong buai ol pipel i tromoi nabaut long siti. Spet bilong buai i bagarapim ples bikos ol lain i no save long pasin bilong kaikai buai na spet. Ol i mekim nating olsem man i gat sik long bel i trautilim kaikai i kam bek autsait.

Pasin bilong klinim ples em i mak bilong ol pipel husat i luksave long sindaun long klinpela ples. Yumi man, tingting bilong yumi klia moa long ol enimal na



yumi yusim kru long het bilong yumi long luksave long wanem pasin i gutpela na wanem pasin i krangki. Tasol i luk olsem sampela bilong yumi i no kamap long dispela mak yet. Yumi sindaun long tudak yet olsem na i no luksave long ol bagarap spet na pipia bilong buai i ken kamapim sapos yumi mekim nating.

Tingting bilong Gavana long klinim siti em i gutpela

na ol pipel i sapotim. Tasol pasin bilong stopim buai olgeta em i no inap mekim siti i klin. I gat ol pipia plastik beg na ol botol i save kamapim moa bagarap insait long siti. Ol plastik i bagarapim ol baret, flai nabaut arere long rot, pas long ol banis na slip nabaut long olgeta kona bilong siti. Sapos Gavana i laik siti i mas klin oltaim, orait em i mas stopim ol plastik beg in-

sait long siti. Putim tambu long ol stua i yusim plastik beg long putim ol samting pipel i baim long stua.

Wanpela gutpela eksampel bilong taun i no gat plastik em Tabubil long Westen provins. Ol pipel bilong taun yet i stopim ol plastik beg bikos long pipia na bagarap long envairomen. Na tude taun bilong ol i klin na ol pipel i save pinis long yusim ol bilum na narapela kain

beg long putim ol samting long taim ol i go baim kaikai long stua o maket. Tabubil i soim gutpela eksampel long yumi olgeta i ken bihainim.

Mosbi tu inap mekim olsem.

Narapela samting tu em long skelim ol pasin bilong Nesanel Kepitel Distrik Komisn (NCDC) yet long rausim pipia long ol pablik ples. Oltaim ol tin pipia long pablik ples i pulap na kapsait tasol i no gat ol woklain i kam rausim pipia. Dispela kain pasin i soim ples klia olsem NCDC tu i slek long wok bilong en long lukautim siti. Bipo ol i bin baim wanpela masin bilong brumim ol pipia arere long rot na ol kain samting olsem skin buai. Tasol nau yumi no lukim moa pes bilong dispela masin. Ating em i mas ovawok na i bruk daun pinis o? Yumi no klia.

Ol lain i salim buai i no save baim takis long NCDC. Em i tru, bikos dispela bisnis i stap long han bilong ol infomel sekta. Ol lain bilong ples i planim buai, daka na karim i kam salim long ol namel man na ol gen i karim i kam maket long siti.

I no gat wanpela takis i go long han bilong NCDC long taim dispela ol bisnis lain i mekim wok bilong baim na salim buai. Olsem wanem? Gavana i tingting long putim takis o nogat? Mobeta em i skelim gut tingting bikos buai i save kam long Sentral na Galp provins. Nogut ol pipel long dispela tupela provins i

kisim taim nating long bikhet pasin ol lain long siti i mekim.

Na ol dispela lain i sindaun nating arere long ol stua na spetim buai long rot bilong wokabaut bai kisim wanem kain mekimsave? Em ol kain liklik lain olsem i save givim nem nogut long ol arapela manmeri. Ol papa bilong stua tu i save larim ol kain lain olsem i sindaun banisim spes long ai bilong stua. Ating ol tu i mas kisim sampela mekimsave bilong NCDC. Ol tu i pret long rausim ol lain i salim buai bikos em ol sekyuriti bilong ol ya.

Bikpela siti bilong yumi long PNG i kamap bikpela tru nau. Populesen i winim mak bilong milien pinis. Kain kain kalsa na tok ples i pulap. Pasin bilong yumi long kaikai buai bai i no inap pinis.

Bai em i stap yet. Olsem na mobeta yumi skelim olgeta rot bilong lukautim na klinim siti bipo long yumi kamapim strongpela lo bilong stopim buai. Sapos yumi gohet na stopim buai, em i soim ples klia olsem gavman i no gat moa aidia o narapela rot bilong daunim wanpela liklik hevi insait long siti.

Tasol yumi i no save sapos sampela gutpela tu bai kamap long dispela lo bilong stapim buai insait long Mosbi siti.

Ating sampela bisnisman na meri bai painim narapela gutpela rot bilong kisim saplai i kam long siti we ol pipel bai painim yet buai. Bai yumi lukim.

Oposisen painim wanem samting stret?

Oposisen lida Belden Namah i tok em i raun long ovasis long mekim sampela wok painimaut long gavman bilong Papua Niugini we Peter O'Neill i go pas long en.

Namah i no tokaut klia long wanem samting stret em go painimaut tasol em tok taim em stap ausait, em i ken lukluk i kam bek na lukim planti bikpela asua i stap. Em i raun klostu olsem 15 wik olgeta wantaim wanwok bilong em na Deputi lida Sam Basil.

Orait yumi ol lain i stap bek long kantri na pilim wanem samting bin kamap long yumi bikos long ol bikpela gavman disisen em olsem asailum sika long Manus ailan, ol loya kisim bikpela mani long Fainens Dipatmen na sampela bikpela kontrak na wok bisnis gavman i bin givimaut.

Ol kain disisen olsem i save kamapim bel nogut na tingting nogut long ol pipel na ol lida bikos kaikai bilong ol disisen o eksen olsem i save kamapim



hevi long yumi.

Yumi save olsem disisen bilong gavman long kisim ol ranawe lain bilong ovasis i kam putim long Manus ailan em i no disien bilong Palamen o kabinet. Em i disisen bilong Praim Minista Peter O'Neill yet wantaim olpela PraimMinista bilong Australia, Kevin Rud.

Taim tupela mekim dispela wanbel o agrimen, Australia i makim olsem K1 bilien long givim long PNG we Praim Minista Peter O'Neill i tok bai putim ol dispela mani go long stretim Angau haus sik, Madang rot na Hailens rot. Tasol Manus yet bai kisim wanem helpim long dispela agrimen we samting tru i kamap antap long graun bilong ol?.

Nau Kevin Rud i lus pinis long ileksen bilong Australia na nupela Praim Minista nau em

Tony Abbott. Olsem na bai Tony Abbott i karimaut dispela agrimen bilong olpela Praim Minista wantaim PNG o nogat?.

Tasol toktok bilong nupela Praim Minista Tony Abbott em klia olsem em bai stopim ol sip long namel long solwara na salim ol ovasis ranawe lain o asailum sika i go bek.

Long niuspepa yumi ritim ol loya wok long kisim mani long Fainens dipatmen na polis i holim ol na sasim ol i stap. Tasol ol dispela mani em ol loya i bin mekim wok bilong gavman bilong Peter O'Neill. Olsem na ol i mas kisim pei bilong ol. Olsem wanem na polis i wok long holim na sasim ol?.

Em i samting bilong kot tasol yumi ol ausait lain bai askim kain kwesten olsem bikos em ol bikpela mani mak long milien kina na moa.

Inap Belden Namah i tok stret long wanem samting tru em i painimaut long ovasis long asua bilong gavman bilong Peter O'Neill? Nau polis i laik

holim Belden Namah bikos ol tok sampela mani bilong ol pipel bilong Vanimo Grin i no go stret long mekim wok bilong pipel.

Long PNG em ol lida i save long painim kain kain rot bilong daunim na bagarapim wanpela narapela.

Dispela gavman bilong Peter O'Neill i gat 30 mun bilong kisim malolo na mekim wok we Oposisen i no inap long kamapim vot i nogat bilip long em. Gavman yet i bin kamapim dispela lo long dispela yia na skruim taim bilong vot i nogat bilip go long 30 mun. Bipo em 18 mun.

Olsem na Oposisen i ken wet inap long 30 mun i pinis, orait ol ken traim long pusim vot i nogat bilip long gavman bilong Peter O'Neill. Nau yet em ol i ken bungim olgeta kain kain evidens o rekot egensim gavman na holim i stap inap 30 mun bilong gavman i pinis, orait ol ken soim aut na pulim tingting na sapot bilong ol memba sapos ol laik senisim gavman.

WANTOK Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea Telephone: (675) 325 2500 Fax: (675) 325 2579 Email: editorial@wantok.com.pg Websait: www.wantokniuspepa.com Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga Acting Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general term acceptance are available at Word Publishing Company Ltd and are set out full on the display advertising terms.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wangepa singsing blong bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - NIUS - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

Raun wantaim Wantok kru ...

Wilwil helpim wok blong ol plesman

James G. Kila i raitim

SAPOS yu ron long planti ol rurel komyniti long PNG we i gat kolta rot long en, bai yu no inap abrus long lukim planti baisikol o wilwil i ron long rot.

Dispela samting i save sevim gut nids bilong ol lain long ples bikos em wangepa kain trenspot we i save helpim long mekim wok bilong ol isi taim ol i laikim samting o muv hariap long wangepa ples i go long arapela.

Long ol bikpela haiwe long Sentral olsem Hiritano na Magi Haiwe, bai yu no inap lukim baisikol o wilwil i ron tumas long kolta rot. Tasol sapos yu go olsem long Buluminski rot long Nu Ailan, stat long Kavieng i go Namatanai o long Markham long Morobe na tu long Not Kos Rot (NCR) long Madang bai yu lukim baisikol o wilwil i mekim save ron i go kam.

Planti olm lain i save yusim wilwil long mekim gutpela wok. Ol i save yusim wilwil long ron i go longwe ples bikos taim ol i wokabout lek bai tait na san i lukim ol. Tasol taim ol ron long wilwil ol i save mekim samting hariap na tu taim ol i ron i go kam naispela win stret i save kisim ol na filings bilong ol tu i save stap antap stret.

Ol bagaros husat save ron long baisikol o wilwil tu i save soim kain kain stail bilong ol yet. Sampela i save kamap olsem ol 'resa' man long wilwil bilong ol tasol long tromoi lak o traim pulim ol yangpela meri. Yes, dispela em stail yumi no ken hatim bikos ol lain long ples na rural komyniti i gat kala na stail bilong ol yet.

Sampela yangpela man husat i gat baisikol i save stailim gut tru na putim ol erial na hangamapim lap-lap long soim stail bilong ol.



Tupela poroman long Bau Pramerai Skul long Trens-Gogol long Madang em resa tisa Michael Bileng wantaim Samson i bungim wangepa lokal poroman Ham Kuh husat i ron long wilwil long Trens-Gogol rot. Foto: James Kila

Sampela i save putim ol hon o pairap long soim olsem ol i ron i kam.

Sampela senisim stail na wil bilong baisikol tu. Kain stail bilong ol em yumi no save tasol ating ol i laik kamap olsem ol mekanik bilong

baisikol fektori o ol i laik tromoi umben tasol long rausim wangepa yangpela resa meri in sanap long sait long rot long ples o wokabout i kam long gaden. Yes, em fri kantri so em stail bilong ol boi bilong ples.

EMTV Television Guide

FONDE SEPTEMBER 19, 2013

4:57 AM G AUSTRALIA NETWORK
5:00 AM G JOYCE MEYER - 1043-4
5:30 AM G EMTV NEWS REPLAY
6:00 AM G TODAY

5:30 PM G TRAPPED YR.1 EP#19
6:00 PM G EMTV NATIONAL NEWS
7:00 PM G RAIT MUSIKEP #179
8:00 PM G RESOURCE PNG EP#89

FRAIDE SEPTEMBER 20, 2013

4:57 AM G AUSTRALIA NETWORK
5:00 AM G JOYCE MEYER - 1043-5
5:30 AM G EMTV NEWS REPLAY
6:30 AM G TODAY

9:00am Grade 7 Mathematics
9:50am Grade 7 Science
10:40am Grade 8 Mathematics
11:20am Grade 8 Science

4:57 AM G AUSTRALIA NETWORK
5:00 AM G JOYCE MEYER - 1043-5
5:30 AM G EMTV NEWS REPLAY
6:30 AM G TODAY

SARARE SEPTEMBER 21, 2013

4:57 AM G AUSTRALIA NETWORK
6:00 AM G EMTV NEWS REPLAY
7:00 AM G IN HIS STEPS
7:30 AM G ULTIMATE GUINNESS WORLD

SANDE SEPTEMBER 22, 2013

4:57 AM G AUSTRALIA NETWORK
6:00 AM G EMTV NEWS REPLAY
6:30 AM G IT IS WRITTEN "7133"
7:00 AM G HILLSONG

TORO



BIABIA



KANAGE



TOKWIN

Sindaun bilong ol asailam sika hia...

Wanem kainkain ol toktok i wok long go ikam wantaim yumi PNG na Australia bai kamapim wanem samting long bihain taim? Yumi wok long toktok i stap na long las wik tasol wanpela bot bilong ol asailam sika i kapsait autsait long Krismas Ailan klostu long Australia. Ating faivpela manmeri idai na planti i kisim bagarap..em bai olsem wanem nau? Bai ol i kam long Papua Niugini na kisim

marasin long hia o Australia bai lukautim ol na bihain salim ol i kam long hia..I luk olsem bihain long ol yia i kam,bai yumi gat hamas tausen asailam sika bai kam long hia na pulumapim Manus ailan, na tingim, Manus ailan em liklik ailan. Na sapos ol i kam insait long ples olsem hailans na setoldaun, mi no save long bihaintaim bilong hailans. Bikos planti ol asailam sika bilong ples Afganistan, Irak o Muslim i save long mekim ol bom long ples bilong ol. Ol i ronawe long bikpela pait long hap.. Bai ol i lainim yumi long we bilong

kamapim ol bom em bai mak nogut nau. Sampela ol birua long traibol pait ples bai kamap olsem ol suisaid bomas long ples bilong ol..Wanem taim ol dispela asailam sika long Afganistan i save long mekim gaden long ples bilong ol? Yu save olsem ol i nogat wail pik, muruk,kapul,sikau, paradais pisin, pisen sinek long ples bilong ol? Em i orait, mi no save, tasol nogut em wok bilong Bikman Papa God i salim ol i kam long hia long PNG long senisim sindaun bilong yumi olsem kristen kantri...Tokwin Tasol..

Long yupela ol gutpela Wantok rida i save wokim ol Sudoku kroswod pasel, dispela em nupela SUDOKU. Long solvim Sudoku pasel, putim wanpela namba long wan wan bokis na olgeta ro olsem akros, daun, na olgeta liklik 9-pela bokis skwea long bikpela daigrem o bokis (i gat 9-pela olgeta) bai gat ol namba long 1 inap long 9. Wanpela namba i mas kamap wanpela taim tasol long wanpela ro. Wok wantaim ol namba olsem gaid o stia na wok long pinisim wan wan daigrem wantaim ol missing namba we bai mekim yu painim solusen. Tenkyu na gutpela pilai

STATIM PILAI

Lukluk long namba 9 kolom, bilong pasel piksa i stap long han kais. i gat ol sain insait long pasel bai i ken toksave long wanem hap insait long dispela kolom bai namba 3 i go.

Nambawan sain i stap long namba 8 kolom insait long piksa. I gat wanpela namba 3 insait long namba 5 bokis. Bai yumi i no i nap long putim wankain namba tupela taim insait long wanpela 3 x 3 bokis eria, olsem na yumi bai i no i nap putim namba 3 insait long bokis namba foa, faiv o siks insait long namba 9 kolom.

Yumi ken rausim tu tripela bokis daunbilu tru long namba 9 kolom bikos i gat wanpela namba 3 insait long dispela 3 x 3 bokis eria tu. Olsem na dispela namba 3 i mas go long namba 2 o 3 bokis bilong namba 9 kolom.

Laspela sain nau i stap insait long namba 2 lain bilong piksa na em i gat wanpela namba 3 pinis long en. Loa bilong pilai i tambu long wanpela namba i kamap tupela taim insait long wanpela lain, olsem na i gat wanpela bokis tasol nau i stap long dispela namba 3 i go insait — em namba 3 bokis bilong namba 9 kolom.

Bihainim dispela stail na wankain tingting na rausim i nap ol pasel bokis i pulap olgeta. Sapos yu laik save moa long insait bilong dispela pilai, yu ken go long webait long penny-dellpuzzles.com.

EXAMPLE Sudoku grid with numbers and empty cells.

EXAMPLE SOLUTION Sudoku grid with numbers filled in.

Ansa bilong las wik SUDOKU 11

8x8 Sudoku grid for the weekly puzzle.

9x9 Sudoku grid for the 12-week puzzle.

Ansa bilong SUDOKU 12 long neks isu.

EMTV Television Guide

Television schedule table with columns for time, program name, and channel.

Ol Progam na Kilok i ken tenis oltaim...

Independens selebret



MIS SEN PETERS: Long makim Momase rijen, Miriam Meros (namel) i winim taitel bilong Mis Sen Peter Channel 2013. Em i sanap wantaim ol famili bilong em.



SKUL PIKININI SELEBRET: Sen Peter Channel Peris long Erima, NCD i bin selebretim 38 bonde anivesari bilong PNG long stail olsem tripela poto daunbilo i soim. Hia em Bruder Victor Piniaw wantaim ol student bilong em long Sen Peter's Praimeri skul i singsing long selebresen taim bilong ol.



EM I KEN SINGSING TU YA! Rose Maguna i hatim singsing i stap long independens de selebresen long Sen Peter Channel Peris, Erima. *Ol Poto: Anna Solomon*

Raun wantaim Kanage olgeta wik

Joe i stap pinis!
 KANAGE kamap olsem wanpela lidaman bilong ples. Wanpela taim em i harim kot bilong wanpela yangpela man na yangpela meri. Komplon i kam olsem man ya i laik holim meri ya tasol em i ron-awe. Ol lain bilong meri ya soim dres bilong em i bruk long kot. Kanage askim man ya, "Joe, yu sikirap long wanem samting na yu brukim dres bilong Susana?" Na man ya i tok, "Askim Susana pas-taim. Mi bai toktok bihain long em!" Olsem na Kanage tanim na askim Susana long tok aut. Susana i tok, "Baten i strong tumas olsem na mi brukim tret". Kanage askim em, "Taim trek i bruk, Joe stap we?" Na Susana i tok, "Joe i stap pinis!" Kanage tanim na tokim mama papa bilong meri ya, "Yupela harim pinis. Lukim tupela i pas pinis. Larim tupela marit tasol. Kot dismis!"



meri bilong em. Kanage na misis bilong em i no save na kisim meri ya i go stap long haus. Long avinun, pikinini man i kam na painimaut olsem na em i no wanbel liklik wantaim papa na mama bilong em. Em kirap na bikmaus long papa Kanage, "Yu laikim em, orait, maritim em namba 2 meri bilong yu!" Papa Kanage i no wanbel long kain toktok olsem na tokim em, "Yu! You are my son, my son proper. When I tell you to wife it, you wife it! You no wife it, okay, your education is small things. Money and animals for brides and prices are very thing tome. You listening or any more talkings!" Pikinini man harim na kilim skin long lap long tok pisin bilong Kanage. Kanage belhat na bikmaus gen, "You nothing to love me?"

Mt Hagen Westen Hailens Provins

"You laugh again, they will arrest you"
 KANAGE em wanpela tisa long

gret tu. Em tis i stap na i go sindaun long tebol na ritim sampela samting long pepa. Tasol Kanage i no sindaun gut na ol sumatin i lukim sem bilong em na olgeta i stat long lap. Kanage kirap na askim ol, "What's funny?" Olgeta sumatin i pret na sindaun isi. Tasol pikinini man bilong Toro strong na kirap tok, "Uncle, we saw two policeman and one raskol!" Kanage kirap na askim, "Where?" Pikinini bilong Toro tok, "There, you sat them!" Kanage kisim tingting pinis na em tokim em, "You laugh again, they will arrest you!"

Kundiawa Chimbu Provins

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: jwilson@wantok.com.pg

Mi wari bikos man bilong mi i raun wantaim marit meri

Dia Laipain

MI MARIT long 10-pela yia, na mi gat tupela naispela pikinini. Mi na man bilong mi em mitupela ol Kristen lain. Mi wok long glasim man bilong mi stat yet long mitupela i marit na long namba 5 yia bilong marit, mi painimaut olsem em i wok long paul wantaim wanpela marit meri.

Wanpela taim, mi bungim dispela meri long opis bilong em na mitupela i pait. Bihain long dispela, mi bin ting olsem tupela i stopim paul na raun pasin, tasol nogat. Mi harim ol stori olsem tupela i poroman paul raun yet. Insait long 5-pela yia, man ya i wokim planti samting long dispela meri. Meri ya bai lusim man bilong mi o?

Worried about my children
Dia Pren,

TENKYU long serim wari bilong yu wantaim mipela. Mipela i sori long kain hevi olsem yu bungim long en. Yutupela marit em ol Kristen na yu wok long mekim samting long traim stretim hevi i kamap long marit laip bilong yu.

I gutpela olsem yu wok long traim mekim samting long stretim wari na hevi bilong yu. Taim ol man i komplon na i no mekim samting long stretim wari o hevi, hevi bai stap yet na i ken go bikpela sapos ol i lusim olsem i stap. Taim manmeri i luksave olsem i gat hevi i stap na mekim samting long stretim, ol i kamap papa bilong hevi o wari we ol i mas lukim olsem ol i stretim.
 Pren, mipela i bilip olsem yu bin traim



long toktok wantaim man bilong yu long dispela hevi tasol yu no tokim mipela em i tok wanem. Sapos yu no tokim ol papamama bilong yu long dispela samting, i moabeta yu tokim ol na ol ken helpim yu long dispela hevi yu gat long en. Na ol lotu pren bilong yu? Yu ken toktok long sios pasto o ol gutpela marit lain we i ken givim yu gutpela stia na toktok.

Marit bilong yu i gat luksave long ol loa bilong yumi long kantri olsem sios, sivil na gavman o kastom pasin?

Hevi long paul pasin namel long ol marit lain long dispela kantri i wok long go bikpela na em i wanpela bikpela samting we yumi mas klia long en. Yumi save olsem i gat planti mama na papa we i bungim dispela hevi, tasol ol i no toktok. Ol stap isi na karim hevi ol yet. Sampela i mas tingting long nem na luksave ol i gat long en, sampela i pret long ol man bai paitim ol nogut, sampela i pret olsem dispela samting bai kamapim sem long ol, sampela i gat mani hevi, sampela ol pikinini na planti moa.

Yu ken kisim Ristrening Kot Oda long man bilong yu na dispela marit meri sapos ol i wok long pren na paul wantaim yet.

Laipain i save promotim helti marit

we i gat amamas long en. Sampela taim, wanpela i mas sanap strong na wokim samting long kamapim senis na stretim hevi olsem dispela yu gat long en.

I moabeta yu lukluk gut long rot yu bihainim long stretim hevi yu gat long en. Long kamapim hevi, tupela lain wantaim insait long en. Watpo na dispela hevi i kamap? Em i stat olsem wanem? Sampela ol samting em yu yet i mas askim yu yet na ansaim ol.

God i God bilong laik pasin na kamapim bel isi pasin. Em i gat intes o laik long laip na welfea bilong yu. Go long God bikos em i laikim yu. Ritim Matyu 11: 28 na Romens 8:28.

Ringim mipela long namba 3260011 long kisim moa stiatok o kam long opis bilong mipela na yumi ken toktok na yu ken kisim kaunseling tu.

God i ken givim yu bel isi na gutpela tingting.
 Pren bilong yu

Laipain

Sapos yu gat wari o hevi, rait i kam long dispela etres: Lifeline Counselling Services, P O Box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspela, tasol mipela bai putim ol wari na hevi bilong yu.
Laipain

RSPCA Wantok progrem kamap strong...

Nicky Bernard i raitim

PLANTI bilong yumi save laik lukautim ol enimal olsem wanpela famili bilong yumi. Na planti bilong ol tu i kamap olsem pikinini bilong yumi. Sampela bilong ol i kamap olsem bodi gad o wasman bilong haus long taim yumi go raun.

Ol dispela enimal olsem dok, pusi, kapul na koki em planti bilong yumi save laik lukautim long wanem ol i save harim tok, taim yumi skulim ol na lukautim ol olsem famili stret.

Tasol wanpela samting em taim ol i sik, o taim kaskas i kamap long ol, em nau bai yumi stat long kros na rausim ol na bai yumi no inap lukautim ol gut.

Dok em wanpela gutpela piksa. Long taim laus i pulap long skin na kaikai olgeta gras bilong em pinis bai yumi no inap bisi olsem em dok yumi lukautim.

Mi go raun na lukim dispela haus sik we ol i save lukautim ol sik enimal olsem, dok, pusi, kapul o liklik pisin na sampela arapela ol enimal.

Dispela liklik haus sik bilong ol em stail stret. I gat liklik wod bilong ol sik enimal we ol nes bilong ol em ol yangpela Papua Niugini manmeri yet. Ol save lukim ol enimal olsem ol sik manmeri long ol bikpela haus sik.

RSPCA em i wanpela bilong ol haus sik bilong ol enimal na em stap long Pot Mosbi tasol. Planti sik enimal long Mosbi save go long dispela haus sik long kisim helpim.

RSPCA i gat wanpela progrem ol kolim WANTOK. Ol i save kisim dispela progrem i go long ol

skul long lainim ol skul pikinini long elementri i go inap long gret tu long pasin bilong lukautim ol enimal.

Dispela Wantok progrem bilong ol i wok long kamap bikpela nau na planti ol skul save askim ol long raun go long skul bilong ol.

RSPCA Wantok progrem i skulim pinis moa long 2,000 pikinini long faivpela isi samting long lukautim enimal bilong ol. Pasin bilong givim kaikai, wasim stretim na sampela liklik samting moa.

Wanpela bod memba bilong RSPCA, Ronel i tok, dispela progrem i bilong skulim ol pikinini long laikim ol enimal bilong ol na tu ol bai gat save long lukautim gut ol enimal bilong olsem famili bilong ol.

"Mipela wantaim ol NCDC nau i wok wantaim long lukim olsem ol manmeri no ken salim ol enimal long rot. Em i tambu nau, sapos mipela lukim bai mipela rausim long han bilong yu," Ronel i tok

Em tok planti bilong ol dispela enimal em ol liklik yet na taim ol pipel i holim na kam salim, em ol i bagarapim ol dispela enimal. Planti pipel i save kisim ol koki na magani i kam salim long kisim mani, tasol ol i no tingting olsem ol bagarapim ol dispela enimal.

RSPCA haus sik i gat ol dok na pusi bilong lukautim i stap bihain long ol kisim marasin na sut bilong ol na kamap gut tru. Sapos yu laikim wanpela dok yu ken go lukim ol long opis bilong ol long Waigani draiv klostu long ova het bris. Na sapos wanpela enimal bilong yu sik yu ken karim go long haus bilong ol.

EM PREN BILONG MI: Ronel Fourie, em wanpela bod memba bilong RSPCA, em go sekim ol enimol long haus sik bilong ol na holim Smali dok na pilai wantaim. *Poto Nicky Bernard*



Perot o koki..



Ol wok man bilong RSPCA na NCDC holim ol kapul ol man bin salim long rot na ol kisim long ol. Nau i Tambu long salim ol enimol long rot, sapos ol dispela lain painim yu ol bai kisim ol dispela enimol yu laik salim. *Poto Nicky Bernard*

Maru laik kamapim Yalu industrial pak

OLPELA kokonas plantasin long Yalu, autsait long Lae siti, bai i kamap namba wan industrial pak long PNG ol i kolim "Yalu Model" sapos plen bilong Minista bilong Komes, Tred na Industri, Richard Maru wantaim Morobe Gavana, Kelly Naru i karim kaikai.

Minista Maru i raun i go lukim Yalu plantasin wantaim Gavana Naru las wik long toktok long kamapim kain ekonomik developmen we bai helpim ol pipel. Dispela em sapos ol papagraun i tok orait na amamas long lukim kain samting i kamap.

Mista Maru i tokim ol pipel bilong Yalu viles toksem ol i no ken salim graun bilong ol nating i go long ol autsait lain. Em i tok ol papagraun i mas lisim graun na wok wantaim

long sait long invesmen. Em i tok em i gat bikipela tingting long lukim moa Papua Niugini manmeri kamap gutpela bisnisman na meri na i no ken stap nating na lukim ol narapela lain i kamapim bisnis long dispela taim we PNG i lukim moa ekonomik wok i kamap.

Mista Maru i tok ol yumi long PNG i stap nating na ol bisnis i wok long go long han bilong ol autsait lain. Dispela i lukim nau yet 80 pesen bisnis em i stap long han bilong ol autsait lain na planti ol pipel bilong yumi i wok long salim buai na smok long strit i stap.

Minista Maru i tok long wok raun bilong em i go long Niu Silan na Indonesia i no long taim i go pinis, em i luk-save olsem Industrial Pak i

bringim planti gutpela helpim tru long ol pipel na gavman.

Em i tok Yalu komyuniti bai kisim planti gutpela helpim long sait long manmeri i kisim wok na kamapim bisnis sapos dispela plen bilong kirapim wangepa industrial pak i karim kaikai.

Morobe Gavana, Kelly Naru i tok tenkyu long minista long gutpela tingting bilong en. Em i tokaut olsem Morobe Provinsal Gavman bai wok bung wantaim ol papagraun na Nesanel Gavman long lukim dispela plen i karim kaikai taim ol i stat long kisim samting long kirapim wok.

Mista Maru na Morobe Gavana Naru i laik lukim Praim Minista i brukim graun long statim projek long mun Oktoba.



Morobe gavana Kelly Naru na Komes na Industri Minista Richard Maru i dring kulau long ples Yalu long stretim toktok wantaim ol pipel long kirapim 'Yalu Industrial Pak.'

Namba 4 Tuna Konfrens bilong Pasifik i kamap

Frieda Sila Kana i raitim

MOA long 200 deliget i kamap long Honiara, Solomon Ailans long stap insait long namba 4 Pasifik Tuna Tred konprens stat long aste Trinde 18 Septemba na i pinis tude.

Planti bilong ol lain i kamap long kibung i kam

long 40 Pasifik kantri husat i memba bilong FFA (Forum Fisheries Agency) na ol i memba tu bilong Patis Naru Agrimen (PNA).

Praim Minista bilong Solomon Ailans, Gordon Darcy Lilo i bin opim dispela kibung insait long FFA Konfrens Senta long Honiara.

Dairekta bilong Nesanel

Fiseris long PNG, Sylvester Pokajam i tok PNG NFA i bin givim K1.7 milien i go long Solomon Ailan long helpim ol long kamapim dispela forum.

Em i tok maski tuna i bringim mani i kam long planti ol Pasifik kantri, mipela i laik lukautim gut bilong wanem em i wangepa



Man ol i kolim 'king bilong tuna' bilong Siapan i kam long Tuna Forum.

kaikai bilong mipela na laip bilong mipela.

I gat moa long 200 deliget i kamap man I go pas long INFOFISH bilong Malayisa husat i redim dispela forum, Abdul Basir Kunhimohamed i tok dispela em bai wangepa bikipela kibung stret bilong Tuna.

I gat planti lain husat i kamap em ol investa bilong Siapan, Tailen, Filipins na olgeta ailan kantri bilong Pasifik. PNG deligesen i bin go wantaim Menesing Dairekta bilong Fiseris Atoriti, Sylvester Pokajam, Siaman bilong Nesanel Fiseris, Job Pomat, Gavana bilong Manus, Charlie Benjamin, Gavana bilong Madang, Jim Kas na ol narapela lain husat i wok long Tuna Fising indas-

tri i kamap.

Mista Pokajam i bin bekim sampela toktok long midia konprens na em i tok long PNG i gat lo i tok orait long olgeta lain i ken painim pis na salim long kisim mani na kamapim gutpela sindaun.

Tasol bikipela hevi em i save bungim ol liklik lain bilong kisim na salim pis em ol i no gat ol infrastraksa. Kain samting olsem liklik bris bilong solwara, bot na gutpela rot.

Narapela hevi i stap long PNG na ol arapela Pasifik kantri i kisim bikipela moa mani long ol tuna bilong yumi em long bikipela mani bilong pawa, wara, na kos bilong karim ol kago i go i kam.

Em i narakain long ol arapela kantri long Asia, olsem Tailen na Filipins. Ol i ken

kisim pis na kamapim moa mani bilong wanem pe bilong ol kain samting i no dia tumas.

"Ol gavman bilong yumi long Pasifik i mas tingting long kamapim moa infrastraksa long helpim ol lain bisnis long kisim pis na tu long mekim isi long ol ovasis investa long kam insait na mekim bisnis," Mista Pokajam i tok.

Em i tok moa olsem em i no stopim sibed maining long kamap tasol nau yet PNG i no gat wangepa lo olsem Mineral Risos Atoriti i gat long lukautim ol samting i stap aninit long graun.

Ol gavman bilong yumi i mas kamapim kain lo olsem bilong ol samting long solwara tu.



Advertise your Business right here!!

We deliver your message right to the remote areas of PNG where others don't go.

Wantok Niuspepa is your medium to communicate your business now.

Niuspepa Bilong Yumi Ol PNG Stret!!



Call the Advertising team on,
Ph: 3252500 Fax: 3252579 or
Email: advertising@wantok.com.pg or
Website: www.Wantokniuspepa.com



Tim Ramu soim moa impruvmen long 2013 Nesenel ERT Salens

TIM RAMU husat i bin go long 2013 Nesenel Imejensi Rispons Salens long las mun i soim stret kala bilong ol long mekim gut tru na kampani i amamas tru long ol.

Maski olsem em namba tu taim tasol long Ramu NiCo i salim tupela tim bilong en long dispela salens, ol boi i soim stret kala bilong ol na winim sampela medal long ol salens ol i go insait long en.

Ramu NiCo i salim tupela tim, wanpela bilong KBK Main na arapela long Basamak Rifaineri.

Nesenel ERT Salens long dispela i bin kamap long Ogas 27 i go 30 na Mineral Risoses Atoriti (MRA) i kamapim na Ok Tedi Main i lukautim long dispela yia na i bin kamap long PNG Difens Fos Murray Bareks long Mosbi.

Dispela 2013 salens i lukim 9-pela tim i kam long seven-pela main long kantri."

Man husat i go pas long Tim Ramu em Helt, Sefti na Enviromen Jeneral Menesa, Wayne Basson wantaim helpim blong KBK ERT TreininMenesa, Daniel Round na BSK ERT Menesa, Dave Williams.

Ol salens long kompetisen i kamap long eria bilong rop, kilim indai paia, sets na reskiu, helpim ol lain long birua, stap strong na menesim ol birua.

Gutpela stori o risalt bihain long kompetisen i lukim BSK Tim bilong Ramu NiCo i kamap namba tu long kilim paia (fire fighting) salens na KBK Tim i kam namba tri.

Tasol bikpela luksave em BSK Tim i bin kisim medal olsem "Most Impruv Tim" na wankain tu em KBK Tim i kisim medal olsem "Most Encouraged Tim".

Gutpela samting na stori Ramu NiCo i mas amamas long tupela tim bilong en em olsem maski em namba tu taim tasol ol boi bilong yumi i bin go long kompetisen, ol i soim strong, stail na kala bilong ol stret na kamap namba tu na namba 3 long stail na teknik bilong kilim paia indai taim birua I kamap. Dispela win i soim olsem ol i save trening gut tru na harim tok na bihainim rot long mekim samting stret.

BSK ERT Trening Kodineta, Paul Tomelis i tok tupela i soim naispela salens na em fea long wanem mak ol i kamap long en long kompetisen. Tasol em I tok i gat sampela eria ol i mas wok strong bihain na



Tim Ramu i redi long salens.



Basamak ERT Kodineta, Paul Tomelis givim stia-tok bipo long salens.



Basamak Tim resis long wanpela salens.



Birua long rot we ol tim i mas soim stail long helpim.

ol bai kamap top tim. Wanpela eria em i tok tupela tim i mas trening strong long en em level bilong resis o kompitens.

ERT Salens i bin gat ol kompetisen long pepa tu i bin kamap long sait long "Best Posta" na "Most Seif Woka" kempein.

Ramu NiCo i soim kala bilong en stret taim Wang Qi bilong BSK Tim i winim 'Best Posta' awot na Li Dan bilong KBK Tim i winim 'Most Seif

Woka' medal.

Daniel Round bilong KBK Tim i tok olsem kompetisen long Nesenel ERT Salens i givim bikpela ekpiriens o save nau long Tim Ramu long sait long wok hat aninit long presa na tu resis wantaim ol arapela ERT tim bilong ol arapela main long PNG.

Mista Round i tok wanpela samting em i lukim na harim long ol tim membas bilong KBK Tim em ol i

lainim planti samting na i luk olsem long neks yia Tim Ramu bai soim narapela kain strong bilong en long dispela nesenel ERT salens.

Em i tok amamas na tenkyu long olgeta memba bilong Tim Ramu long pasin bilong harim tok na komitmen ol i soim long trening pastaim long ol i kisim balus na go long Mosbi long dispel salens.

PNG Sif Mains Inspekta, Mohan Singh, long taim bilong givim ol

medal na awot long ol tim askim olgeta lain long holim strong dispela spirit o gutpela pasin na wok bilong sefti taim ol i go bek long wan wan wok-ples bilong

"Yupela olgeta lain em wina. Mi laik yupela karim gutpela spirit bilong sefti i go bek long wan wan wok-ples bilong yupela na mekim wok-ples em seif na gutpela long olgeta lain i amamas long wok," Mista Singh i tok.

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamak rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**Wanpela
Ramu NiCo,
Wanpela
Komyuniti**

Ol kakau groa kisim helpim long baim trenspot

OL kakau groa long 4-pela provins bai kisim helpim long ol freit kos o kos long putim ol kakau beg long trak na sip na salim i go long ol maket.

Ol provins em long Wes Nu Briten, Is Nu Briten, Nu Ailan na Madang.

Gavman i putim K13 milien i go long Kokonas Indastri Kopresen (KIK) na Kakau Bot bilong PNG long helpim tupela indastri long sapotim ol groa na fama long tupela eria insait long tripela yia i kam, taim prais bilong ol i no gutpela, o i pundaun.

Aninit long projek, kakau bot i luk-luk long ol ples i stap longwe insait long 4-pela provins long baim kos bilong kisim ol kakau beg bilong ol i go long ol provinsel senta, na bai isi long putim ol long sip na salim i go aut.

Ol i ting long mekim olsem wanpela taim long wan wan mun.

Long ol ripot, KIK i wok long sab-sidaisim prais bilong kopra, tasol

Kakau Bot i wokim narakain na i fandim kar o trak o sip long karim ol kakau beg long ol ples i go long maket ol i salim ol prodak na kisim mani long en.

Long nau, Kakau Bot i wokim awenes long 4-pela provins na projek bai stat bihain long 4-pela provins i sainim Memorandum ov Agrimen wantaim Kakau Bot.

Ripot i tok tu olsem Kakau Bot bai yusim ol siping ejensi long karim ol beg kakau wanpela taim insait long wanpela mun i go long ol hap bilong salim.

Mani bilong dispela projek bai stap wantaim Kakau Bot, tasol ol bai givim mani sapos ol fama i givim in-vois na ol pepa long ol siping ejensi o ol lan i givim sevis.

Gutpela samting ol groa bai kisim em, ol groa bai stap long ples na kisim pe long ol beg kakau bilong ol, na ol I no inap tromoi mani long trenspot na ol narapela kos.



Kakau diwai na ol sid bilong en. Ol yelo em ol mau na redi long rausim.



BIKPELA KAIKAI: Afrika yam i kamap gut stret long graun bilong yumi long PNG olsem dispela ol draipela kaikai bilong Afrika Yam i soim. *Poto: Wantok Fail*

PNG na SI gat fam masin projek

PNG na Solomon Ailans i gat wanpela projek long kamapim gut na mekim ol samting ol fama i yusim long wok bilong ol.

Ol i kirapim dispela projek long dispela yia wantaim mani helpim bilong Yuropien Yunien-Asia Karibien na Pasifik (EU-ACP) grup.

Taim ol fama i gat gutpela save na tu, ol gutpela masin na ol tul long mekim ol wok fama,

bai ol i kamapim moa kaikai na kwaliti bai kamap gut.

Projek lida, Nosare Maika i tok as tingting bilong projek em long kamapim ol liklik masin bilong yusim long eria bilong egrikalsa long ol fama bilong PNG na Solomon Ailan.

“Dispela bai strongim awenes long yusim ol liklik masin na ol egrikalsa prodak bai karim gutpela kaikai. Em bai daunim hevi long sot long ol wokman na

graun long ol faming komyuniti,”

Mista Maika i tok. Long mun Februari long dispela yia, NARI i bin stretim ol wok long wanpela asples kampani, Innotech Limited long wokim wanpela liklik ensiniaring woksop long Bubia, Lae.

Mista Maka i tok bai gat ol masin samting bilong mekim ol mentenens long ol egrikalsa masin.

- **Stori i kam long NARI Nius**

Kivori redi long climate change

CLIMATE Change o senis long taim bilong san, ren, win, kol, tuhat na stap bilong solwara tude, i bikpela samting i kamapim hevi long laip na sindaun bilong man.

Wanpela bikpela samting we senis bilong klaimet i kamapim em hevi long kaikai na wara. Ol pipel i mas painim rot long planim kaikai long kain senis long abrusim taim bilong kaikai i sot na ol pipel i hangre.

Sauten Rijinel NARI senta long Laloki i wok wantaim Dipatmen bilong Egrikalsa na Laip-stok Len Yus Brens long wanpela Fud Sekyuriti Pilot projek long Kivori klostu long Bereina, Sentral Provins.

Opis bilong Klaimet Senis na Dvelopmen i go pas long ol wok we

Pasifik Komyuniti, wanpela NGO bilong kantri Jemani, na Pasifik Rijinel Environmen Progrem long Yunivesiti bilong Saut Pasifik i wok bung wantaim long putim mani bilong kamapim dispela projek.

Ol bin statim dispela projek long las yia, 2012, long helpim ol komyuniti long Kivori eria long planim ol kain kaikai we bai no inap bagarap long kain taim olsem, na pipel bai no inap bungim hevi na hangre.

Ol ailan kantri long Saut Pasifik i stap namel long ol kantri we bai kisim bagarap long klaimet senis. Na i gat bikpela tingting nau long wokim samting nau na no ken wetim taim em i leit pinis.

Taim bilong bikpela

san i kamap longpela taim, taitwara, solwara i solap na go insait long ol ples na sol i bagarapim graun na ol binatang i bagarapim ol gaden kaikai, em ol hevi we klaimet senis i kamapim long kaikai.

Projek tim i bin raun i go lukim na glasim eria we bikpela ren na taitwara i kamap long en na tu, planim gen ol gaden kaikai long ol ples ol i makim long ol, na putim banis waia long gaden.

Ol bin karim ol sid, ol pikinini banana, tapiok, Afrika yam, kon, rais na ol rop bilong kaukau long Laloki Egrikalsa stesin long planim long Kivori projek.

- **Stori i kam long NARI Nius**

PORO PRAIS LILIK MOA YET

Kimbe	↔	Kokopo	K 199
Lae	↔	Kimbe	K 279
Lae	↔	Madang	K 199
Lae	↔	Popondetta	K 249
Lae	↔	Kokopo	K 329
Lae	↔	Wewak	K 349
Madang	↔	Wewak	K 199
Port Moresby	↔	Daru	K 349
Port Moresby	↔	Alotau	K 269
Port Moresby	↔	Mt. Hagen	K 299
Port Moresby	↔	Lae	K 249
Port Moresby	↔	Losuia	K 349
Port Moresby	↔	Misima	K 349
Port Moresby	↔	Popondetta	K 199
Port Moresby	↔	Wewak	K 349
Port Moresby	↔	Cairns	K 349
Cairns	↔	Port Moresby	AUD 199

Ol dispela pei blong balus em blong wan wei tiket tasol. Na em blong ron blong balus namel long namba 10 dei long mun Septemba na namba 30 dei long mun Novemba 2013. Igat ol rul na kondisen ikaramapim dispela. Poro prais bai i pinis long namba 19 dei long mun Septemba 2013

Ringim mipela long 7222151
or lukim websait
www.apng.com

Airlines PNG

PORT MORESBY	- Level 1, Pacific Place	321 3400
	- Vision City	7373 4250
MT. HAGEN	- Central Highlands Printers	542 0662
	- Kagamuga Airport	542 2732
LAE	- Micro Bank Ruan, Fifth Street	479 5980
POPONDETTA	- Top Town (opposite Memorial Park)	629 7638
ALOTAU	- Preston White Street	641 1288
GOROKA	- Airport	532 2532
TABUBIL	- Airport	649 9171
KIUNGA	- Airport	649 1125
MADANG	- Global Travel	422 0011
KIMBE	- Travel Line Ltd	983 4409
RABAUL	- Rabaul Hotel	982 1999

Ol spot eksen poto long wiken...

Ol Poto Nicky Bernard.

KAM KISIM: Pilaia bilong Hard Rock(15) i holim bal long lek bilong em, taim pilaia bilong Difens i traim long rausim long lek bilong em long pilai bilong tupela long Bisini Soka graun long Pot Mosbi.



RAGBI LIG: Ol pilai bilong Magani i memeim stret pilaia bilong Tarangau long A gret pilai bilong ol long PRL.

MIPELA YA: Tripela pilai bilong Pot Mosbi Vipers i holim tropi ol winim long Digicel Kap Ragbi resis long dispela yia. Long han kais i kam long han sut, Samuel Koim, Adam Korave na Steven Johns.



TOKSAVE: Salim ol spots dro bilong yu kam long Feks; 325 2579, e-mel; bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



SKOA na DRO

FAINALS WIK WAN

Fraide: Septemba 13, 2013



Suncorp Stadium

Rabbitohs 20 Storm 10



Sarare: Septemba 14, 2013



ANZ Stadium

Roosters 4 S/Eagles 0



Toyota Stadium

Sharks 20 Cowboys 18



Sande: Septemba 15, 2013



ANZ Stadium

Bulldogs 6 Knights 22



SEMI FAINOL DRO

Sarare: Septemba 21, 2013



AAMI Park

Storm V^s Knights



Sande: Septemba 22, 2013



Brookvale Oval

S/Eagles V^s Sharks



Bai:



Roosters



Rabbitohs



INOSEN VIKTIMS: Jonathan Thurstan (senta) i tok dispela yia gem bilong Stet ov Orijin i bin panisim ol Cowboys long pilai bilong ol long Sarare.

NAMBA tu kepten bilong North Queensland Jonathan Thurstan i mekim sampela toktok olsem Queensland Stet ov Orijin gem win dispela yia i daunim gem bilong ol

taim referi i mekim sampela ol strongpela disisen long Cow-boys i lusim gem.

Long wanpela hap we ol i pilai, namba 7 takol we referi i tok orait na givim trai long

Cronulla Sharks, nupela tru long NRL gem long Brisbane long Sande.

"Yu ken lukim, i no mi tasol i lukim, olgeta manmeri tu i lukim", Thurstan i tok.

Taim Queensland i dominet Stet ov Orijin, New South Wales i wok long krai long ol samting na kisim yet.

Stet ov Orijin i wok long kilim gem, em tru.



CANTERBURY Faiv-eit Jis Renolds i holim bek aiwara bilong em na holim pasim gutpela poro bilong em Ben Babar husat i pinis wantaim Bulldogs na pilaim las fainals gem bilong em wan-taim ol.

Long las yia eliminesen fainals, ol bin traim hat i go na lus long Newcastle 22-6 na nau wankain samting i kamap gen dispela yia.

OL GUTPELA PORO: Canter-buy pivot Josh Reynolds (senta) em wari tru taim em i save olsem Ben Barba i pilaim las gem bilong em wantaim ol Bulldogs (seken long hankais).



WANKAIN YET: Sisen bilong Todd Carney i no gutpela long bagarap em i kisim taim ol i pilai wantaim Queensland Cowboys long Sarare. (Getty Images"Mark Metcalfe, file poto)

KOSA bilong Cronulla Shark Shane Flanagan i tok em bai givim taim long star- pilai bilong ol Todd Carney long pruvim em yet inap taim bipo ol i kik-off long Fraide semi-fainol egens Manly long Sydney Futbol Ste-dium.

Carney em kisim ham-string bagarap bipo gem na stap aut tupela wik long bi-hain ol i pilai wantaim Queensland Cowboys kisim 20-18 winim eliminesen fainol.

Tasol Fanagan i tok long Mande olsem taim ol i skenim bagarap bilong em, em i soim olsem em i orait long pilai long dispela Fraide.

PNL's Information & Music Leader

FRIDAY 20 SEPTEMBER

Vs

7.45PM
BROOKVALE OVAL

SATURDAY 21 SEPTEMBER

Vs

7.45PM
AAMI PARK

LIVE GAME CALLS

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NUC 100.3	RAMU 100.3	TOLLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATOFA 107.5	NUKU 100.8	TASUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAUBULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

PNG Pawa i sempion klap

Michael Novingu i raitim

PNG Pawa softball klap bilong ol man long Mosbi i nekim ol brata bilong ol Pot Mosbi Bears wantaim 10-1 long nesenel softbal klap sempionsip long indpendens wik long Kokopo.

Dispela em namba tri taim bilong PNG Pawa winim nesenel klap softbal sempionsip.

Maski hevi ren I pundaun na ples i wet ol lain bilong PNG Pawa il putim strongpela pilai long stopim Bears long sko. Ol pilaia bilong Bears i traim strong long sko tasol ol i no inap long brukim banis bilong ol pawa man.

Tripela Tovia Brata Ezekiel, Daniel na Demas i mekim samting stret long pits, na paitim strongpela bal. Ol Bears i no inap long stopim ol lukim ol hom run i ran olsem wara na ol i nekim ol Bears.

Dispela i no stopim ol Bears long skoim ol hom ran long seken innings Anslom Bunbun i paitim wanpela strongpela bal we ol PNG Pawa bois i no inap stopim.

Long las inings em wan sait gem we ol pilai bilong PNG Pawa i paitim ol gutpela na strongpela bal. Pakar Pidil, Eugene Tovue, Alister Tavol, na tripela brata Ezekiel, Daniel na Demas i kam hom long kisim sko i go 10-1 long winim dispela sempionsip.

Long gem bilong ol meri Manalos softbal klab long Lae i nekim United sisters wantaim sko 10-3 long winim nesenel klap sempionsip.

Ol meri long Manalos i bihainim gem plen ol i yusim long las yia na ol i winim dispela sempionsip.

Ol meri Manalos i putim strongpela pilai we ol united sisters i no inap stopim ol. Tasol dispela i no stopim ol long sko. Ol mekim tripela hom ran long las ining long kisim sko i go 3.

Ol Manalos meri i kisim sevenpela hom ran long las ining long kisim sko i go 10-3 long winim bek sempionsip we ol i bin winim las yia.

Demas Tovia long PNG Pawa i kisim awod long gutpela pilai, na Tara Toman-gana bilong Manalos tu i kisim awod long pilai bilong ol meri.

Long wankain taim, senia vais presiden bilong PNG Softbal Federesen, Ralph Tarasomo i tokaut olsem neks softbal klap sempionsip bai kamap long Kokopo long Ista wiken long 2014.

Tarasomo i tok tenkyu long Kokopo long lukautim dispela sempionsip we i lukim ol I gat gutpela hap bilong pilai. Em i tok tenkyu long ol pipel bilong Is Nu Briten long gutpela lukaut ol i givim long mipela long taim bilong mipla i kam stap long Kokopo.

Tim PNG mekim gut tru

TIM PNG go long 2013 Mini Pasifik Gem long Wallis na Futuna i mekim gut tru na karim nem bilong Papua Niugini. Dispela toktok em Sif de Misin Richard Kassman i mekim.

Em bin tokim Praitim Minista Peter O'Neill na Spot Minista Justin Tkatchenko long welkam seremoni bilong ol long Gate Way Hotel long Pot Mosbi. Em i tok Tim PNG i kamapim gutpela pilai na ol top embeseda bilong PNG.

"Mipela mekim gut tru na no gat wanpela bikpela rong i kamap long mipela," Kassman i tok.

"Mipela makim long stap insait long Top 3 tasol mipela pinisim pilai long topim olgeta wantaim 30 Silver, 26 Silver na 31 Bronze wantaim total medel long 87 olgeta," Kassman i tok gen.

Praitim Minista Peter O'Neill i tokim ol pilai manmeri olsem gavman i kisim 3-pela stadium nau na ol bai stretim long redi long 2015 gems na bai gavman i spendim moa long milien kina long stretim olgeta hap bilong pilai bipo long 2015 gems bai kam long PNG.



TENKYU STOP N SHOP: Gavana bilong NCD Powes Parkop i tok tenkyu long bikpela stua long Mosbi, Stop N Shop long givim helpim long ragbi tim bilong Mosbi Vipers long Digicel Kap resis. Stop N Shop em bikpela sponsa bilong ol Viper long tupela yia nau. Gavana Parkop i kamapim bek Vipers taim nem bilong em i bin dai long sampela yia i go pinis. Parkop i givim bek tropi go long han bilong Sudhir Guru Eksekutiv Darekta bilong CPL tai mol i bin mekim liklik bung kaikai bilong ol pilaia long Vision Siti long Pot Mosbi. *Stori na Poto Nicky Bernard*

Tim PNG givim bikpela Indipendens presen

PRAIM Minista Peter O'Neill i tok Tim PNG husat go pilai long 2013 Mini Pasifik Gems long Wallis na Futuna i givim PNG bikpela presen long taim bilong Indipendens amamas.

"Tenkyu tru na welkam hom," O'Neill tokim ol pilai manmeri na ol opisal.

"Mi makim maus bilong gavman na ol pipel bilong Papua Niugini long tok tenkyu long yupela. Yupela givim wanpela bikpela presen long PNG long dispela taim bai yumi amamasim 38 Indipenden. Yupela mekim mi amamas na tenkyu gen long yupela," O'Neill i tok.

Em i tok spot em wanpela inpoten eria long komyuniti we i no gat luksave, na dispela mekim yumi stap bihain long ol narapela long sait bilong spot tasol yumi wok long kets ap long sampela spot.

Em i tok tu olsem, yumi investim klostu long 2 bilien

kina long mekim ol wok bilong stretim ol samting bilong 2015 Saut Pasifik Gems na bai go yet. Yumi bai tanim olgeta ston long mekim dispela bikpela pilai bai namba wan tru long Saut Pasifik.

Kassman i tok PNG gat moa long ol wan wan medel taip long ol narapela kantri

na teroteri we bai stap insait long dispela mini gems.

Tahiti kam namba tu wantaim 26 gol 9 silva na 5 brons na Nu Kaledonia kam namba tri wantaim 21 gol 13 silva na 9 brons medel.

Kassman tok tu olsem PNG givim bikpela han long

ranim dispela gem long sait bilong ol teknikal opisal long ol kain kain pilai.

Em i tok Nu Kaledonia em winim olgeta pilai long wanem ol kam wantaim olgeta pilai manmeri bilong filivens maski PNG winim planti long ol trek ivens.



Sanapim spot edmin straksa long ol wod

BIHAIN long givim trening long ol lain i lukutim ol spot long ol wod, namba wan wok em long kamapim ol edministretiv straksa bilong komyuniti spot.

Long mekim dispela wok, i mas gat ol save wok-lain bilong mekim edministretiv wok. Tasol wantaim trening na save ol i kisim pinis, em bai isi long mekim wok.

Pastaim stret, singautim wanpela bung wantaim ol komyuniti, sios na yut lida, ol tisa na ol pablik sevan. As tingting bilong bung em long kisim ol tingting bilong pipel pastaim long sanapim spots edministresen straksa.

Bihain long komyuniti i wanbel, makim interim komiti bai mekim wok bilong draftim mama lo bilong lukautim ogenaiesen bilong spot long komyuniti. Dispela i kamap olsem stia bilong ol spot long komyuniti.

Mama lo i mas karamapim olgeta eria bilong spot edministresen long komyuniti. Dispela em i ligel pepa i givim stia long edministresen long ol samting em bai wokim na long ol objektif bilong asosiesen.

Interim komiti i mas kamapim draf insait long tupela wik na bihain long dispela, singautim bung long glasim draf na pinisim wok na tok orait long fainol draf.

Aninit long dispela fainol draf, na bihainim lo, ileksen i mas kamap bilong makim ol presiden, namba tu, sekreteri na tresera.

Bikpela samting em long save olsem mama lo bai givim stia long ol wok ol bai mekim.

Long taim bilong miting, membasip bai op olsem mama lo i tok. Ol bai kirapim ol klab na kisim ol lain i gat wankain intres. Piksa em, soka asosiesen bai statim kompetisen o resis bilong em na olgeta bai go long klab na ogenaiesim ol yet long mekim wok.

I masa gat registresen long ol memba. Sekreteri na tresera i mas mekim wok. Na wankain tu long ol arapela memba.

Taim sekreteri i gat nem bilong olgeta long rejista, tresera tu i mas gat kesbuk na baset bilong yia. Ol narapela komiti memba bai lukluk long ol fan resing wok, redim ol ples we ol bai holim ol resis taim ol narapela bai lukautim oda o i no gat trabel i kamap long ol klab na asosiesen bilong ol.

Moabeta olgeta wod i gat wankain straksa, na tu, ol i mas gat stendet spot kalenda bilong ol samting bai kamap long yia.

Olsem mi bin tok long las wik, ol samting bai no inap wok gut sapos i no gat sapot i kam long distrik na LLG presiden.

Dispela i mas kamap olsem modol o piksa straksa ol wod i kisim na bihainim.

i kam long bek pes

PNGFA saspensim NCDFA

Tasol long taim PNGFA i kisim, em i givim i go long ol loya bilong em na Osenia Futbal Konfederesen long skelim na stretim.

Misis Kapi Natto i toke m i kirap nogut long pas bilong Mista Dimirit i tok ol i skelim ol pepa wok na NCDFA bai i

no inap stap moa long ol soka resis bilong PNGFA. Dispela pas i soim olsem ol i saspensim NCDFA inap olgeta pepa wok i redi.

Patron bilong NCDFA John Kapi Natto i tok Dimirit yet i lukim kompetisen bilong

NCDFA na em i ino wanbel long kain pasin PNGFA i mekim.

"Mi kros nogut tru bilong PNGFA i daunim em yet long kamapim dispela kain pasin. I tru sapos NCDFA i no bihainim sampela pepa wok, orait PNGFA ofisel o maus-

man bilong PNGFA long Sauten Rijen i mas tok klia na stretim isi. Nau i no gat gutpela as long saspensim NCDFA," em i tok.

Kapi Natto i tok dispela sapsensen i bagarapim tru gutpela wok NCDFA i wokim long strong yut soka insait

long NCD.

"Bikpela wari nau em planti ol yangpela soka pilaia bai wokim wanem nau. NCDFA i suspend na ol pilaia bai no gat samting long wokim. Na ol bai tainim i go bek long ol kain pasin raskol na pasin hambak long strit we i ken

bagarapim sindaun bilong komyuniti," patron i tok.

Kapi Natto i singaut i go long PNGFA long no ken pilai politik. PNGFA i mas kamapim gutpela rot o we ol yangpela soka pilaia bai amamas long mekim - pilai soka olgeta wiken.



DIANA Blu
TUNA IN OIL

NEW IMPROVED!
 TUNA IN OIL
 Net Wt. 425g

Moa oil na meat insait

PNGFA saspendingim NCDEFA



Vonnie Kapi-Natto, Presiden bilong NCDEFA.

PAPUA Niugini Futbol Asosiesen i saspendingim NCD Futbol Asosiesen bikos ol i no bihainim ol long senisim nem bilong asosiesen bilong en.

Olpele nem bilong NCDEFA em NCD Pablik Sevan Soka Asosiesen.

NCD Pablik Sevan Soka Asosiesen i no bin ron gut inap ol nupela eksekutiv bilong Vonnie Kapi Natto i kisim ples na em i kamap olsem wanpela nambawan soka kompetisen bihain long Pot Mosbi Soka Asosiesen long NCD.

Presiden Vonnie Kapi Natto i guria nogut taim em i kisim pas long PNGFA sekretari generel Dimirit Mileng las wik tasol.

Misis Kapi Nato i tok em i bin salim ol pepa bilong senisim nem bilong asosiesen i go long PNGFA.

MAMA: Straika bilong Difens i ronim bal taim difenda bilong Hard Rock ronim em long bek sait long Supa Lig pilai bilong ol long Bisini long Mosbi.

Poto Nicky Bernard

Lukim insait

● NRL semi fainol dro - Pes 26

● PNG Pawa i sempion klap - Pes 27

Moa long Pes 27



Valvoline
PMV
DIESEL OIL

BOROKO MOTORS

PMV OIL BILONG YUMI

BOROKO MOTORS	
PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
 Website: www.boroko-motors.com